



嘉興府志

ル 5
1574
28



門五
1574
卷 28

卷五十六

嘉興府志卷五十六

嘉興府知府善化許瑤光重輯

列傳

海鹽縣

漢

陸康字季甯祖父續父褒有志操康少仕郡以義烈稱舉
茂才除高成令舊令戶一人具弓弩以備不虞長吏新
到輒發民繕修城郭康至皆罷遣以恩信為治寇盜亦
息遷武林太守轉桂陽樂安二郡時靈帝欲鑄銅人國
用不足乃調民田畝斂十錢而比水旱傷稼百姓貧苦

康上疏諫免歸田里復徵拜議郎會廬江賊黃穰等攻沒四縣拜廬江太守康申明賞罰擊破穰黨獻帝即位天下大亂康蒙遣孝廉計吏奉貢朝廷詔書策勞加忠義將軍時袁術屯兵壽春遣使求委輸兵甲康以其叛逆閉門不通術遣孫策攻康圍城數重康固守受敵二年城陷發病卒朝廷愍其守節拜子儁為郎中後漢書傳案

三國吳

海鹽圖經用姚士粦陸顧世譜載康以下譜系甚詳蓋陸氏世居長谷即華亭谷在海鹽縣東北二百里見吳地記及寰宇記天寶十載始割海鹽北境立華亭縣則當未割之前陸氏應歸鹽邑無疑第其敘次兩家以宗派類聚今一以時代為次序云

顧雍字元歎從蔡伯喈學琴書州郡表薦為合肥長後轉任婁曲阿上虞皆有治跡孫權領會稽郡以雍為丞行太守事入為左司馬權為吳王累大理奉常領尚書令封陽遂鄉侯進封醴陵侯代孫邵為丞相平尚書事其所選用文武將吏各隨能所任時訪逮民間及政職所宜輒密以聞卒諡肅侯長子邵早卒次子裕有篤疾少子濟嗣無後以裕襲

顧徽字子歎雍母弟孫權聞徽有才辨召署主簿轉東曹掾或傳曹公欲東拜徽輔義都尉到北與曹公相見公具問境內消息厚待遣還拜巴東太守卒子裕字季則

少知名位至鎮東將軍

案顧雍次子裕而徽子亦名裕此係同祖弟兄必非同名裴松

之注引吳錄云
雍子裕一名穆

顧悌字子通雍族人以孝悌廉正聞於鄉黨年十五為郡

吏除郎中稍遷偏將軍權末年嫡庶不分悌數陳禍福

言辭切直朝廷憚之待妻有禮常夜入晨出希見其面

嘗病篤妻出省之悌命左右扶起冠幘加襲起對趣令

妻起其氣潔不瀆如此悌父向歷四縣令年老致仕悌

每得父書常灑掃整衣服更設几筵舒書其上拜跪讀

之父終飲漿不入口者五日服未闋而卒四子彥禮謙

秘秘晉交州刺史秘子眾尚書僕射

陸績字公紀父康績博學多識星歷算數無不該覽孫權

辟為奏曹掾出為鬱林太守加偏將軍績雖有軍事著

述不廢作渾天圖註易釋元皆傳於世年三十二卒長

子宏會稽南部都尉次子徽長水校尉

陸遜字伯言康從孫仕孫權幕府歷東西曹令史海昌屯

田都尉領縣事縣連年亢旱遜開倉賑貧勸督農桑百

姓蒙賴會稽山賊歷年不禽遜討治深險所向皆服為

右都督呂蒙稱疾詣建業權問誰可代者蒙對遜可大

任乃拜撫邊將軍封華亭侯進封婁侯以破張南馮習

功拜輔國將軍領荊州牧改封江陵侯拜上大將軍右

都護代顧雍為丞相年六十三卒長子延早天次子抗襲孫休時追諡遜曰昭侯

顧邵字孝則與舅陸績齊名權妻以策女起家為豫章太守下車祀先賢徐孺子墓優待其後禁淫祀非禮之祭小吏資質佳者令就學擇其先進擢置右職風化大行在郡五年卒官子譚承譚字子默弱冠與諸葛恪等為太子四友從中庶子轉輔正都尉赤烏中代恪為左節度每省簿書未嘗下籌屈指心計盡發疑謬祖父雍卒數月拜太常代雍平尚書事是時魯王霸有盛寵與太子和齊衡譚上疏諫霸與全琮子寄搆譚坐徙交州著

新言二十篇卒于交趾承字子直嘉禾中與舅陸瑁俱

以禮徵芍陂之役拜奮威將軍與譚俱徙交州卒以上三國

吳志

陸抗字幼節年二十拜建武校尉遷立節中郎將與諸葛恪換屯柴桑拜奮威將軍為柴桑督破魏軍歷遷征北將軍鎮軍將軍都督信陵西陵彝道樂鄉公安諸軍事時都下政令多闕疏陳時宜十七條西陵督步闡據城以叛抗討誅之加拜都護晉大司馬荊州牧疾病上疏曰西陵國之西門雖云易守亦復易失若有不守非但失一郡荊州非吳有也乞以西方為屬遂卒子晏嗣晏

及弟景元機雲分領抗兵晏為裨將軍景以尚公主拜
騎都尉封毘陵侯既領抗兵拜偏將軍中夏督晏為王
濬別軍所殺景亦遇害元早天諡貞獻處士三國志參海鹽徐志
陸凱字敬風遜族子由縣長歷除儋耳太守討朱厓有功
遷建武校尉累遷征北將軍假節領豫州牧封嘉興侯
遷左丞相孫皓時徙都武昌政事多謬黎元窮匱上疏
極論君暴臣諂政謬民窮之故表疏皆指事不飾忠懇
內發疾病皓遣中書令董朝問所欲言凱陳何定不宜
委國事奚熙小吏建起浦里田欲復嚴密故跡亦不可
聽姚信樓元賀邵張悌郭連薛瑩滕修族弟喜及抗皆

晉社稷禎幹國家良輔願重雷神遂卒弟允子禕
仇志
三國志參海鹽

陸允字敬宗為御史尚書選曹郎太子和聞其名待以殊
禮會全寄楊竺等阿附魯王陰相譖搆允坐收下獄後
為衡陽督軍都尉交阯九真夷攻沒城邑以允為交州
刺史安南校尉允喻以恩信高涼渠帥黃吳等皆出降
加安南將軍復討蒼梧建陵賊破之徵為西陵督封都
亭侯卒子式嗣為柴桑督揚武將軍與從兄禕俱徙建
安召還建業復將軍侯

陸瑄字子璋遜弟好學篤義同郡徐原爰居會稽素不相

識臨死遺書托孤瑁為起立墳墓收導其子從父績早
亡一男一女皆數歲瑁攝養至長州郡辟舉皆不就徵
拜議郎選曹尚書子喜亦涉文籍好人倫為選曹尚書

以上三國吳志

陸禕字元容初為黃門侍郎出領部曲拜偏將軍封海鹽
侯凱亡後入為太子中庶子右國史華覈表薦禕體質
方剛器幹強固董率之才魯肅不過夏口賊之衝要宜
選名將以鎮戍之臣以為莫善於禕初皓嘗銜凱忤旨
後竟徙凱家于建安

吳書參海鹽圖經

晉

陸機字士衡少有異才領父兵為衙門將年二十而吳滅
退居勤學太康末與弟雲入洛張華曰伐吳之役利獲
二俊太傅楊駿辟為祭酒累遷太子洗馬趙王倫輔政
引為相國參軍預誅賈謐功賜爵關中侯成都王穎起
兵討長沙王乂假機後將軍河北大都督被宦者孟玖
等所譖穎使孫秀收機機神色自若機死非其罪刑時
昏霧大風平地尺雪人以為陸氏之冤機天才俊逸辭

藻宏嚴所著文三百餘篇

晉書參趙圖記

陸雲字士龍六歲能文與兄機齊名號二陸年十六入洛
刺史周浚召為從事曰陸士龍今之顏子也補浚儀令

有異政成都王穎表為清河內史轉大將軍右司馬與
機同遇害所著文三百四十九篇新書十篇雲弟耽為
東平祭酒有清譽亦同遇害

顧榮字彥先祖雍吳丞相父穆張勃吳錄曰裕一名穆宜都太守榮

與陸機兄弟同入洛號為三俊歷尚書郎廷尉正以討
葛旟功封嘉興伯世亂還吳屬廣陵相陳敏反周圯與
榮及甘卓紀瞻起兵攻敏發橋斂舟于南岸敏不獲濟
榮麾以羽扇其眾潰散事平還吳元帝鎮江東以榮為
散騎常侍時上牋諫皆納之卒贈侍中驃騎將軍開府
儀同三司諡曰元追封公子毘嗣官至散騎侍郎以上晉書

陸暕字士光瑁孫父英散騎常侍暕少有雅望居喪以孝
聞後察孝廉除縣令不就元帝初鎮江左辟為祭酒預
討華軼功封平望亭侯拜侍中為領軍將軍以平錢鳳
功進爵江陵伯與王導卞壺庾亮溫嶠郗鑒竝受顧命
成帝踐阼拜左光祿大夫開府儀同三司蘇峻之難隨
帝在石頭峻以暕吳士之望不敢加害峻平進爵為公
卒贈侍中車騎大將軍諡穆子湛散騎常侍嘏新康子

晉書參海
鹽徐志

陸玩字士瑤器量淹雅弱冠有美名郡檄紀綱東海王越
辟為掾皆不就元帝引為丞相參軍蘇峻反遣玩與兄

睦俱守宮城玩潛說匡術歸順以功封興平伯遷侍中
司空玩翼亮累世常以宏重為人主所貴誘納後進謙
若布衣搢紳之徒莫不磨其德字薨諡曰康子始嗣歷

侍中尚書晉書

陸納字祖言清操絕俗為吳興太守徵拜左民尚書領州
大中正將應召外白宜裝幾船納曰私奴裝糧食來無
所復須臨發止襪被而已其餘竝封以還官俄拜尚書
令納恪勤貞固始終不渝除開府儀同三司未拜而卒
即以為贈子長生先卒無子以弟子道隆嗣元熙中為

廷尉晉書參海

鹽圖經

顧和字君孝侍中眾族子曾祖容吳荊州刺史祖相臨海
太守和總角有清操王導為揚州辟從事導遣八部從
事之部和為下傳還諸從事各言二千石官長得失和
獨無言導問之答曰明公作輔甯使網漏吞舟何緣悉
聽風聞以察察為政導善之歷拜御史中丞劾奏尚書
左丞戴抗賊污付法議罪并免尚書傅玩郎劉傭官百
僚憚之居母喪以孝聞和居任多所獻納不苟阿撓卒
贈侍中司空諡曰穆子淳歷左衛將軍晉書
干寶字令升少勤學博覽召為著作郎平杜弢有功賜爵
關中侯中興草創未置吏官中書監王導上疏以寶領

國史著晉紀二十卷直而能婉稱良史焉歷始安太守散騎常侍所著別見寶兄慶長甯縣令梁有干朴干元顯竝寶之裔朴散騎常侍元顯中書舍人

晉書參海
鹽徐志

齊

陸慧曉字叔明曾祖納祖萬載侍中父子真元嘉中為海陵太守慧曉初應州郡辟舉秀才衛尉史歷諸府行參軍歷遷吏部郎尚書令吏曹都令史歷政以來諮執選事慧曉任已獨行未嘗與語帝遣左右單景儁以事誚問慧曉曰六十之年不復能諮都令史為吏部郎也出為南兖州刺史卒贈太常

齊書參南史

梁

陸倕字佐公父慧曉倕少勤學善屬文於宅內起兩間茅屋晝夜讀書嘗借人漢書失五行志四卷乃暗寫還之舉秀才竟陵王子良開西邸延英俊倕亦與焉天監初為右軍安成王外兵參軍遷驃騎臨川王東曹掾是時禮樂制度多所創革高祖雅愛倕才選太子中舍人管東宮書記歷太常卿卒文集二十卷行於世第四子纘早慧十歲通經為童子奉車郎卒

梁書

陳

顧野王字希馮祖子喬梁東中郎武陵王府參軍事父烜

臨賀王記室兼五官掾野王幼好學嘗製日賦頌軍朱
異見而奇之年十二隨父之建安撰建安地記二篇長
而徧觀經史天文地理著龜占候蟲篆奇字無所不通
梁大同中爲臨賀王記室宣城王爲揚州刺史侯景之
亂野王丁父憂歸本郡乃召募鄉黨數百人隨義軍援
京邑野王體素清羸居喪過毀殆不勝衣及杖戈被甲
陳君臣之義順逆之理抗辭作色見者壯之侯景平太
尉王僧辯深嘉之使監海鹽縣天嘉初補撰史學士除
太子率更令尋掌國史知梁史事遷黃門侍郎光祿卿
知五禮事卒贈右衛將軍野王篤學至性厲精力行皆

人所莫及第三弟充國早卒野王撫養孤幼恩義甚厚

所撰著別見

陳書參南史
海鹽文獻志

隋

陸士季凱之後也父慶通直散騎侍郎士季初從同郡顧
野王學仕陳桂陽王府左常侍入隋爲越王侗記室侗
稱制擢著作郎王世充將篡逆侗謂士季曰隋有天下
三十年朝果無忠臣乎士季對曰見危授命臣宿志也
請因啟事爲陛下殺之謀洩不克貞觀初爲太學博士

兼宏文館學士

南史參隋
書新唐書

唐

陸元感字達禮父梁學士謀道善班固漢書元感傳其學
 歷建安歷陽縣令咸有善政加朝散大夫護軍行黃州
 司馬卒葬崑山子南金趙璧開元初少卿盧崇道抵罪
 徙嶺南逃還稱南金弔客突入其室金匿之事覺詔御
 史捕按金當坐法璧言匿崇道者我也請死金固言弟
 自誣不實御史上狀竝宥之南金操履謹飭令鄞築堤
 為湖田于頃民為立祠官至太子洗馬新唐書參海鹽徐志
 顧愔從兄大歷初新羅王憲英死詔倉部郎中歸崇敬
 往弔監察御史陸珽顧愔為副愔采其國之人物風土
 作新羅國記一卷又顧萇亦況從兄況集有哭從兄萇

詩云共居雲陽里輶軻多別離是也皇甫冉有送顧萇

往新安詩

新唐書藝文志新羅傳參全唐詩錄

顧況字逋翁至德二載進士志尚疎逸好詼諧素與柳渾
 李泌善德宗時渾居政府以秘書郎召及泌為相稍遷
 著作郎後坐語調謔貶饒州司戶參軍起屋茅山自號
 華陽真逸年九十卒有集二十卷皇甫湜為序湜嘗言
 自吾為顧況集序未嘗許人也又有畫評一卷載通志
 藝文畧子非熊性通敏好辨說氣燄凌轢為眾所抑久
 不第然名在朝野長慶中諫大夫陳商放榜復下第上
 怪無非熊名詔進所試卷覽之追榜赦賜及第累佐使

府大中間為盱眙尉慕父風流亦棄官隱茅山

唐書李泌柳渾

傳參劉大彬茅山志海鹽徐志

褚无量字宏度其先邑河南之陽翟十一代祖盛後漢海

鹽長子孫因居遂為海鹽人刻意墳典尤精理司馬史

記擢明經第累除國子博士遷司業兼修文館學士中

宗將南郊皇后為亞獻无量固爭以為周禮后不得與

元宗即位遷左散騎常侍兼國子祭酒封舒國公母喪

廬墓鹿犯所植松柏无量號訴羣鹿馴擾不復振觸喪

除以耆老隨杖設腰輦許乘入殿中內府舊書甲乙叢

倒請繕錄補第以廣秘籍不數年四庫完治太子齒胄

於學詔无量升坐講百官觀禮厚賚賜卒年七十五詔

曰无量朕師今宜用優典贈禮部尚書諡曰文沒後有

於書殿得講史記至言十二篇上之帝歎息以絹五百

匹賜其家

蘇頌褚公神道碑參唐書本傳

五代

高彥仕吳越武肅王初與同縣沈夏受武肅王意密謀誅

都將徐及會湖州刺史李繼徽棄郡奔淮南彥隨王親

巡其地王雅屬意彥及去語彥曰我以此州授汝矣宜

善撫之奏遷湖州制置使旋升本州刺史加檢校司空

渤海公彥居湖政尚寬簡民頗便之子渭從彥湖州武

肅王巡衣錦城有徐許之亂焚掠郭郭彥聞變亟遣渭
赴難渭言今日不利彥曰赴難之急何待吉辰亟促渭
行遂率所部徑趨靈隱山伏發遇害後淮人檻送徐綰

歸王命剖心祭渭

十國春秋

屠瓌智

海鹽圖經作瓌智

字寶光世居澈浦青山母顧夢抱壁有

光而生故名瓌智少負勇略更善屬文唐時累舉不第
武肅王起鄉兵拒黃巢與幕府籌畫以謀誅董昌功授
指揮使乾甯四年同顧全武自海道救嘉興生擒南唐
將楊勝等二十人又討平衢州刺史陳岌積功領常州
刺史越州都指揮使三年調守潮州徐綰內叛刺史高

彥遣子渭與瓌智赴援直抵靈隱山賊圍數重兩人搏
戰身被百創瓌智奮力一呼手搏數賊以援絕與渭同
遇害武肅王閱其忠命以衣冠招魂而葬天寶五年贈
武康節度使銀青光祿大夫檢校尚書右僕射開府儀
同三司子龍驤澈水鎮遏使昱節度使辰湖州判官

朱行先字蘊之燕領虎頭猿臂善射時人稱曰小由基起
家建甯都將事高彥屢立戰功武肅王擢為節度左押
牙親衛都指揮使及彥子灃敗率眾自歸賜協力覲王
功臣再加佐正匡國功臣晉秩檢校尚書右僕射尋為
靜海鎮遏使在鎮恩威並行甚著聲譽凡十有五年寶

大元年七月卒於官贈銀青光祿大夫上柱國弟行存
行勤行忠子從訓智紹不仕元晟元杲俱節度正散將
元昇節度下將元寶元勝元贊凡八人

以上十國春秋
參海鹽圖經袁

宋

郭三益字慎求父琢治平初進士三益登元祐三年進士
為常熟丞時常平使者調蘇湖常秀四州人濬青龍江
分地程役三益所部前期告辦使者畱其人使助他邑
三益竟引歸使者怒檄追甚急其母周曰役連數郡其
分地程役廩食皆已上聞今吾先畢何名復役之使者

行且悔矣然汝不可無會第無以所部從三益如教使
者果檄止丞勿來累官刑部尚書同知樞密院事

海鹽
徐志

參圖
經

史徽字洵美第進士累遷太常博士時享太廟以宦官押
祭徽建議罷之知青田明敏果斷教民陶瓦覆屋以免
火患建炎初為司農卿扈駕至平江遇害贈右文殿修
撰

沈清臣字正卿為國子學錄宰相惡沈介乃以清臣奔競
下大理風使引介不許謫封州晚始召用勸孝宗力行
三年喪為嘉邨翊善以直諫稱初從張無垢學以聖賢

自命與其徒問答語下不契輒使再參或譏爲禪學云
著有晦巖集十二卷

以上袁志

魯言字季欽兄詹崇甯五年進士朝散郎提舉兩浙市舶
言同弟譽舉紹興五年進士官太府卿言支移拆變事
甚悉利弊詔可其奏言嘗取杜工部集考其年編次而
箋釋之爲十八卷詹子可封進士烏程令言子可宗進
士中博學宏詞科太常卿譽子可簡可簡子开珏及從
子藝瓌璠竝舉進士世其家

海鹽圖經

魯文謐字子順甲戌策第調丹徒尉薦陞司理文謐性閎
爽嗜書史任事必究端緒不爲矯伉不事投合在高郵

理獄梳剔淹滯犴獄空虛及攝丞幕府適山陽流民蟻
聚文謐贊其長極意撫安使得所卒於官平生好義樂
施置義莊義塾弟文博姪鐸皆能以其教顯焉

常濬孫其先蜀人曾祖安民祖同竝見宋史同紹興末寓
海鹽遂世爲海鹽人濬孫乾道中登進士又舉博學宏
詞科爲福州教授教養有法閩士祠祀之

以上海鹽仇志

陸峻乾道五年進士初授江甯縣令累官至刑部尙書峻
守衡楊萬里以書屬其孫爲名流倚重如此

海鹽圖經

趙孟堅字子固號彝齋居士系出安定郡王以父朝奉郎
與采蔭登寶慶二年進士歷官集英殿修撰知嚴州平

反張均平報父讎獄郡歲饑發廩賑贍全活民五萬餘戶遷翰林學士隱居廣陳乘一舟東西游適縣令宣城梅黻造船謁之竟飛棹去梅伋立曰昔人所謂名可聞身不可見殆謂先生歟孟堅善書畫工詩文著有梅譜

書法論傳於世

海鹽圖經參宋書紀事

常楸字長孺淳祐七年進士調常熟尉婺州推官疏決滯訟以剽繁裁劇稱拜監察御史尋爲兩浙轉運使禁戢吏奸不以急符督常賦海鹽歲爲鹽潮害稼楸請捐金發粟輒以帑修築新塘三千六百二十五丈名曰海晏塘遷戶部侍郎兼刑部論雷雪非時之變帝意不悅丐

祠不許以集英殿修撰知平江節浮費修府庫既代有事例餘金萬楮悉不受吏驚曰人言常侍郎不愛錢果然改浙東安撫使值水災捐萬楮以賑之復請糴於朝得米萬石蠲新苗三萬八千又以諸暨被水尤甚給二萬楮付縣折運民食尋以刑部侍郎召平反甚眾兼給事中封還隆國夫人從子黃進觀察使錄黃賈似道以御書令委曲書行楸迄不奉命以寶章閣待制提舉太平興國宮德祐元年拜吏部尚書參知政事宋史陸之望紹興五年進士知會稽縣有惠政時山陰缺令公舉之望攝之王十朋有代王尙書辟陸宰狀有曰前會

稽知縣左奉議郎陸之望為治寬平持己廉靜長于撫
字蔚有政聲會稽士民前後屢請本府及司監舉畱狀
牘具存陸某今方罷官適山陰缺宰臣遂令暫攝職事
邑人咸喜臣欲依條令辟舉陸之望充山陰知縣以慰
一邑之心之望事績不見於史覽龜齡刻牘可見一斑

會稽縣志

元

楊發先世居浦城以軍功土著海鹽之澉浦父春宋武經
大夫發仕宋歷官樞密院副都統元初改授明威將軍
福建安撫使領浙東西市舶總司事卒贈懷遠大將軍

封宏農郡侯子梓嘉義大夫杭州路總管節俠風流尤

善音律與貫酸齋友善卒封宏農郡侯諡康惠梓子耐

翁煥耐翁見孝義傳煥敦武校尉贛州路同知知甯都

州事煥子友直字元坦僮多才官常州通守袁志參
輟耕錄

屠曾字體乾母樂夢王曾而生故名受書於吳草廬延祐

中薦為學教諭至治癸亥中瀾江東榜第一授建康學

正不就隱于家康僖公勳其裔也海鹽圖經參
樵李詩繫

鄭元璠元琰兄弟有學行以知兵顯官至總管別駕時方

國珍張士誠往來海中為寇二人率鄉兵守禦鄉人德

之明鄭端簡公曉其後也袁志

明

丁豫字叔寬洪武初敕聘入京召見問天下治否對曰盜

賊已息但恐復生願以安民為本稱旨授江西按察僉

事詳慎刑法澤被於民民頌之不衰子麒麟皆工詩麒

字彥禎官至濟南知府麟字彥祥洪武乙丑進士除給

事中改御史彈劾不避權要無辜見法臨刑有哀親訓

子詩海鹽仇志參靜志
居詩語構李詩繫

金志剛字大節洪武中為縣三老人都旅見太祖問今盜

賊平未眾莫對志剛曰捕獲已盡惟恐復生上善之拜

知府海鹽
仇志

胡恆性一作
嘗性洪武中以文學被徵授醴陵縣丞清理軍政

以善績著廳前有松數十株公餘偃息其下因顏曰哦

松堂自為記去官醴人思之立祠祀焉嘉禾徵
獻錄

常士昌楸裔孫洪武中以賢良辟為雷州守有古循吏風

卒官妻文登隋氏攜三子歸里伯子縉紳麟成化辛丑

進士選兵部主事轉郎中時火篩內侵畿甸恐大司馬

條畫皆出麟手參知河南有党雄之亂次第削平不煩

朝廷一旅擢福建布政使入覲劉瑾索賄不得逮繫錦

衣衛釋為應天府尹轉禮部侍郎弟龍任壽州知州亦

有賢聲劉
志

曹仁字天爵宋太尉勛裔洪武乙丑進士授工部主事數

月即乞休杜門著述自號知止生四世孫鎮通三禮之

學隱居瀉風村輯仁遺集宏治壬子輸粟五千斛賑饑

授七品散官辭不受時稱曹介士 海鹽圖經 參劉志

葉春字景陽本姓林幼鞠于葉從其姓洪武中自邑吏歷

事吏部永樂初尚書李志剛知其通練薦授主客司主

事歷郎中擢兩淮鹽使改參政福建仁廟嗣位入朝命

與廣西布政使周幹巡視應天鎮常蘇松杭嘉湖八郡

訪民利害建革之改參政四川宣德初朝廷以八郡奸

吏土豪仍肆貪虐毒細民復命春偕大理卿熊概巡歷

訪察浙江豪持郡邑短長為不法者海鹽民平康暴橫

甚聚黨八百餘人捕誅之已悉捕豪惡數十輩械至京

論如法姦宄帖息後又偕錦衣指揮任啟御史顧英太

監劉甯巡視所至秉公推明行之以果無所屈撓春凡

三涖浙治事于鄉人無議其私者 明史熊概傳 參海鹽圖經

陸定字能舒洪武中以牛諒薦授博士累擢監察御史上

封事六條稱旨以疾免官永樂初詔起不赴 吳志

戈定遠字尚武工古文詞永樂丙戌貢入成均遷湖南道

監察御史彈劾封駁無少避忌陞交阯按察使副使莅

官清勤綏柔有方得夷獠心致仕卒 嘉禾徵 獻錄

仲端字惟正永樂辛卯舉人知隨州歲旱民苦饑移兵餉濟之逋寇丁朝龍聚眾流劫至是詣庭待罪調知廣德州擢戶部郎致仕

詹文字好問永樂入成均為刑部郎中時有田青厓者以殺俞一坐死律文疑其獄按之知俞少鬻身于孫扶則孫以貲自豪欲購田墓地不可得陰殺俞移其尸置田室將以陷之文得其狀即釋田坐孫死律時同官有論主僕宜輕減者文曰使田就戮此命不當償之耶文居官明峻類如此以上吳志

朱侃字志剛少為諸生學宮有魅聞呼侃名即滅永樂癸

未舉應天鄉試尋授監察御史出僉憲廣東入為通參

救巡撫廣西執法嚴肅賊吏屏跡當暑有置毒于瓜以

獻者毒發瓜裂試罪犯即斃刑獻瓜人不窮治主者

許珣字士章父伯全以鄉舉諭樂安珣舉正統丁卯鄉試

訓導安溪未期以老乞歸養教授于家張給諫甯劉侍

御泰鄭提舉延皆及其門嘗典應天試稱得士云以上嘉禾

徵獻錄

李孟璿祖衍河南人元末官嘉興路副總管因家苞溪孟

璿以薦官嘉興縣訓導著南莊集弟仲璣季衡皆工詩

季衡有西溪集季衡子景孟登景泰甲戌進士知莆田

修潔有聲亦能詩編皇明正音若干卷

朱祚字天錫以歲貢入國學成化丙子舉人以母老乞祿知龍溪縣調靜安爲政務以德化不事檟楚卒于官所著有拙齋漫稿雲谷集海鹽縣志

鄭延字世昌以選貢官廣東市舶副提舉諸番無敢以方物及門者陳獻章贈詩曰溪魚海舶各歸去明月自照芙蓉峯著有東谷存笥集

鍾海字巨川性剛直能詩以掾吏爲懷遠丞令梅恃甲科陵人海積不能平奏與之辨與梅竝落職事白海獨起丞萬安不數月復飄然賦詩歸歸數年而貧益甚卒以

子梁貴贈刑部主事

海鹽圖經

張甯字靖之景泰五年進士授禮科給事中言京衛帶俸武職一衛至二千餘人通計三萬餘員歲需銀四十八萬米三十六萬并他折俸物動經百萬耗損國儲其間多老弱不嫻騎射之人莫若簡可者補都司衛所缺官而悉汰其餘議格不行帝得疾適遇星變罷明年元會甯言四方來覲不得一睹天顏疑似之際必至訛言相警願勉循舊典用慰人心帝疾不能從而奪門之變作曹石竊柄事關禮科者甯輒裁損英宗以是知甯朝鮮與鄰部毛憐衛讎殺詔甯同都指揮武忠往解甯辭義

慷慨而忠驍健兩人竟解其讎而還中官覃包邀與相
見不往尋擢都給事中憲宗初御經筵請日以大學衍
義進講皇太后生辰禮部尚書姚夔仍故事設齋建醮
會百官赴壇行香甯言傷大體乞禁止帝嘉納之給事
中王徽以牛玉事劾大學士李賢得罪甯率六科論救
由是寢與內閣忤會王竑等薦甯堪僉都御史清軍職
與岳正竝舉得旨會舉多私皆予外任甯出爲汀州知
府以簡靜爲治善政具舉甯才高負志節善章奏聲稱
籍甚英宗欲重用之不果久居諫垣不爲大臣所喜既
出守益鬱鬱不得志以病免歸家居三十年言者屢薦

終不得召無子有二妾甯歿樓居不下者四十年詔旌

爲雙節

明史

劉泰字世亨性耿介不屈于物能詩文工行草書尤精于
法律以庶吉士授河南道監察御史出按遼東及南畿
諸郡嘗疏劾內閣大臣江淵不法事卒移其官天順初
復與同官楊瑄等極論石亨擅權下詔獄幾不免後以

疾卒

海鹽徐志
參圖經

倪顒字廷瞻父政字拱德以鄉舉爲松溪教諭顒天順丁
丑進士授工部主事改兵部遷懷慶知府境內多盜賊
財賦累年逋負顒以廉慎爲治積弊一清藩府人素橫

至此斂戢中菴語下西厰無驗復官擢河東陝西鹽運使嘉禾徵 獻錄

張敏字時勉曾祖景福官大理遂籍雲南父正領解第進士終建甯知府敏以鄉貢知蘭州改知馬湖府夔州鄢藍諸賊起敏帥獾獠兵拒戰敗之陞綿州兵備副使鄢藍餘黨廖陳輩復亂敏入賊營計擒其魁降凡三萬人調山西參政以太僕卿致仕嘉禾徵 獻錄

劉瑋字公奇成化甲辰進士歷官御史督兩淮鹽運兼治河道瑋執法嚴所司有阻壞鹽法者奏擬戍邊遂著為令時兩浙山東水旱疏請賑以鹽筴餘銀全活甚眾高

郵湖風濤不測時壞漕艘築堤四十里別為裏湖通漕

名康濟河擢廣東副使海鹽 徐志

朱瑾字孟瑜以國子生授莆田丞嘗攝令每躬視獄令掃除惡穢不使囚致病豪右彭姓為尚書韶弟姪以巨舶商通島夷犯時禁瑾毀其舶加之罪海島帖然不敢犯

海鹽 仇志

顧正字尚誠宏治壬戌進士由兵部擢刑部郎中時劉瑾擅政用法者稍持平輒被窘辱正苦心平反出為四川參議撫定白水蠻變未幾卒正立身恥為依附而崖岸不立居官廉潔卒之日幾無以為家

劉演字文敷宏治癸丑進士授南職方主事歷刑部郎中
值閣瑾亂政謝病不出日與客縱飲為樂瑾誅薦補四
川參議未赴卒

沈衡字平甫祖孟賢以里中良善受成祖敕獎衡登宏治

庚戌進士授刑部郎欽恤南圻多所全活子奎以神童

召見為翰林秀才早卒

以上嘉禾徵獻錄

董淞字子壬孝子謙子宏治中應薦陳十策命下禮部試
罷以著述為事衢州孔彥繩至聖五十九世孫淪於布
衣淞力言於衢守沈燾奏襲五經博士著有聖學全書

直儒蓋語紫陽正脈若干卷

海鹽續圖經

彭程襲指揮僉事正統十二年寇鄧茂七據延平程率兵
往征十四年正月哨延平下營遇某帥招飲程移營不
赴夜賊偷營不值明發帥問故程曰下營時有怪風占
必有偷營者以故移營軍中服其神明是時都闔帥大
兵屯一山程兵寡傍溪下營寇首朱必森率眾隔溪呼
曰我先殺盡大營回盡殺此營程謂眾兵曰賊回我等
壘粉矣須奮勇盡死力一戰方得生寇乘勝回下溪水
挑戰程兵跣足迎之寇半渡擊大敗之攻後洋前洋等
寨累斬首數百級擒首寇三招撫一千二百餘已而寇
葉宗雷復叛率兵往征屢戰屢捷陞指揮同知

浙江通志

吳昂字德翼海甯祝萃家居教授昂短褐草屨負書往從
祝奇其人欲試之居之牛屋昂欣然掃除受書坐牛屋
中日夜誦不輟後昂既貴聞祝喪奔赴哭踊執心喪三
年昂起家進士令宜城改新建新建人困甯濠索租匿
丁家山以拒濠言民反宜速兵昂身入山諭民民立散
歲大饑賑贍全活幾萬人華林盜起日夜調兵餉以勞
省左日陞南京刑部主事出為福建按察僉事有訟妻
殺夫妻坐死昂閱獄疑之禱于神夢一小兒據人腹昂
曰殺此夫者必杜福子也捕訊服陞山東按察副使旋
陞福建參政古田礦盜起發兵躡捕渠魁散其黨去進

右布政使致仕昂幼孤事母孝家居遇鄉曲利害抗言
有司不得則請于朝精于周禮參訂諸說附以己見凡
四易橐而成鄭曉嘗曰明有兩方伯天台陳公華亭夏
公皆人傑也吳先生學行純固如天台先幾明哲如華
亭而安貞履順斂華就實尤不可及云
構李往哲傳
參海鹽圖經
錢琦字公良正德戊辰進士授盱眙知縣流賊橫行江淮
邑無城郭琦括民為兵嚴戰守之具賊知有備不敢犯
以才薦遷刑部主事進郎中武廟南巡與同官周任疏
諫不報引疾歸世廟初年起南祠祭郎中出知臨江府
屬邑新淦自華林賊亂之後山民梗化者不悛奏析其

地為峽江縣置城郭枹鼓屏息又奏免三年額稅以寬新邑凡舉事必擇民所便故雖有建置輿情安之後調思南乞歸置義田以贍族六子蓼芹葵菡葦萱芹萱有

傳嘉禾徵
獻錄

徐泰字子元髫齡舉于鄉讀書手不釋卷初為光澤令未幾告歸林居四十年日偕同志飲酒賦詩著有玉池橐

談屑春秋鄙見皇明風雅等書海鹽仇志

徐咸字子正泰弟正德辛未進士與人交不詭于俗居官不事儼察守沔陽屬兵燹後咸務在撫輯多全活沔地宜黍鮮植穀咸仿吳地播種法與民習之民享其利陞

南兵部郎民思之肖像為生祠尚書喬宇雅知咸擢守襄陽歲旱恪修雩祀甘澍立應有妖民惑眾咸計磔其渠裔從悉解散著有近代名臣言行錄澤山野錄四朝

聞見錄西園雜記東濱三橐傳維麟明書傳
參廖道南楚記

鍾梁字彥材正德甲戌進士授刑部郎諫止南巡廷杖幾死世宗嗣位擢知濟南平萊蕪反寇邵志賜金綺乞歸養母以薦起補南昌裁正湖地賦役權貴斂手丁艱歸年僅四十既疏請致仕築室郊西與林居諸賢及布衣衲子結文酒社又四十年卒有西皋集嘉禾徵
獻錄

鄭曉字室甫舉鄉試第一成進士授職方主事日波故牘

盡知天下阨塞士馬虛實強弱之數尙書金獻民屬撰
九邊圖志人爭傳寫之以爭大禮廷杖張孚敬柄政器
之欲改寘翰林及言路曉皆不應父憂歸久之不起許
讚爲吏部尙書調之吏部歷考功郎中夏言罷相帝惡
言官不糾劾詔考察去留大學士嚴嵩因欲去所不悅
者而曉去喬佑等十三人多嵩所厚嵩大憾嵩欲以子
世蕃爲尙寶丞曉曰治中遷尙寶丞無故事嵩益怒以
推謫降官周鈇等貶曉和州同知稍遷太僕丞歷刑部
右侍郎俄改兵部兼副都御史總督漕運大江南北皆
患倭通州人顧表者桀黠爲倭導以故營砦皆據要害
盡知官兵虛實曉懸重賞捕戮之募鹽徒曉勇者爲兵
增設泰州海防副使築瓜洲城廟灣麻洋雲梯諸海口
皆增兵設砦遂破倭于通州連敗之如皋海門襲其軍
呂泗圍之狼山前後斬首九百餘賊潰去錄功再增秩
尋召爲吏部侍郎遷南京吏部尙書俺答圍大同右衛
急帝命兵部尙書楊博往督師曉攝兵部曉言今兵事
方棘而所簡聽征京軍三萬五千人乃令執役赴工何
以備戰守乞歸之營伍帝立從之尋還視刑部事故事
在京軍民訟俱投牒通政司送法司問斷諸司有應鞫
者亦參送法司無自決遣者後諸司不復遵守曉奏循

嘉興府志 卷五十一
故事帝報許於是刑部聞捕囚畿輔而巡按御史鄭存仁謂訟當自下而上檄州縣法司有追取毋輒發曉聞率侍郎趙大祐傅頤守故事爭存仁亦據律執奏章俱下都察院會刑科平議議未上曉疏辨嵩激帝怒切讓遂落曉職兩侍郎亦貶二秩曉通經術習國家典故時望蔚然爲權貴所扼志不盡行既歸角巾布衣與鄉里父老游處見者不知其貴人也既卒子履淳等訟曉禦倭功於朝詔復職隆慶初贈太子少保諡端簡履淳自有傳

有傳

明史

案海鹽圖經曉所著有吾學編徵吾錄古言今言奏議文集史論策學禹貢圖說等書其他居鄉善事尤多見

于王文祿文獻志見只編劉忠端人譜諸書者概不復贅云

劉朮字汝冲父演先世贅錢氏朮因冒外姓嘉靖癸未進士授威縣令威地素瘠疲民無宿聚遇水旱不能救朮募積穀萬石以爲荒備倣社倉法轉借貧民歲息十一積數年得穀萬餘石未幾河北無麥威賴以全流民來占籍者三千人又均丁田之役行一年畿輔郡邑父老皆請于上官願得錢知縣均役乃厯旁邑惟內黃南和弊尤甚經理三月民至今尸祝之丁艱歸擢工部主事未赴卒卒之日棺衾不能備其父以歲製者殮之著有

威縣志

威縣志參嘉不徵獻錄

錢芹字懋文琦子嘉靖戊戌進士歷官永州知府每泣事
庭無鞭扑之聲人謂其太寬芹曰牧民猶牧羊去其敗
羣者足矣論調引年歸芹宅心坦易一以至誠待人卽
爲所賣終不忍逆億居家值穆廟新政上言正始當懋
聖學次及本郡海防事宜又言海鹽每歲例貢黃魚宜
罷優詔許之嘉禾徵
獻錄

錢萱字懋孝芹弟嘉靖己未進士由刑部郎改儀制司以
提調試事落級爲德慶州同知地近猺獞大兵數徵調
氏力罷萱至署守事除編徭濫役改運米爲折納審戶
籍令丁役相埒貧富得均方下量移之命染瘴卒海鹽
圍經

參黃懋
官墓志

錢薇字懋垣嘉靖十一年進士擢禮科給事中請令將帥
家丁得自耕塞下田毋徵其賦總督大臣假便宜專制
闔外格不行又疏劾大學士李時禮部尙書夏言工部
尙書溫仁和外戚蔣輪進右給事中郭勛請復鎮守內
官擅易置宿衛將校薇憤疏其不法七事帝眷助然素
知其橫兩不問己因星變極言主德之失帝深銜之未
發疏諫南巡坐奪俸內閣夏言輩所選官僚多以循私
劾罷薇偕同官呂應祥任萬里乞如會推故事集內閣
九卿公舉帝特命竝斥爲民累薦皆報寢集鄉里晚進

與講學足跡不及公府倭患起請於巡撫王忬集兵為

備鄉人德之卒年五十三隆慶初贈太常少卿

明史

案薇為臨江守琦兄珍子歸田後如罷運艘均田則清里甲諸事區處贊畫為利于鄉邑者甚夥隆慶之初既贈太常當事者復為建特祠于縣署之西額曰顯忠薇所著有國朝名臣錄承啟堂稿海石間草學錄樂律諸書詳見褒忠錄及湛若水撰傳

王輔字時佐宣德中隨父戍廣甯中山東鄉試登成化丙

戌進士授刑部主事輔端慤有至性臨終語其子曠曰

我死必返葬我海鹽無忘首邱也曠因復為海鹽人曠

孫家棟舉浙江鄉試第一

海鹽仇志

陳言字獻可生而穎異讀書數行俱下博綜經傳作五經

疑義若干卷出入傳註發先儒所未發領順天鄉薦不

第卒于邸言至性誠篤孝養繼母事其叔如父撫諸弟

以恩里有嫠婦守節甚烈白有司得旌以子所學貴贈

如官

袁志參兩浙名賢錄

仇霽字彥光以貢為硤江訓導嘗書座右云五倫之間甯

過于厚七情所發惟怒難忍以自警丁母邵憂不復出

與徐東濱鍾西皋為詩酒之會子俊卿字舜徵舉鄉試

知惠安縣終國子助教性好讀書至老未嘗釋卷感慨

時事雖家居未嘗不言倭寇時策戰守機宜上幕府多

中窾要死之歲聞平秀吉將入寇猶憤發貽書浙撫請

如漢橫海樓船故事張中國威識者壯之壽九十有二
 所著瀛仙集通史它石海鹽縣志子雲鳳原叟雲鳳博
 學通禪理屢舉不第卒原叟慷慨負大志隆慶間海鹽
 塘圯先是窳有請修築海塘疏至是原叟抱其疏請于
 朝興工修築初啟行鬻產為資斧歸途病卒邑人傷之

海鹽圖經參王
文祿文獻志

沈奎字文明嘉靖戊戌進士歷官刑部郎中江西按察副
 使奎體弱不勝衣而操持介特為郎時宗室詔獄眾依
 違奎直舉大義斷之在江右與臺臣執論無所異避居
 家卻掃與人言恆挹損自下子騰蛟極孝友奎晚生子

騰龍析產不及蛟之半使父事蛟奎卒蛟割產半予蛟
 曰此吾先君不言意也

李儒烈字見川嘉靖丁未進士由廬陵令擢工部員外郎
 忤權貴出為雲南理問稍遷至福建按察使僉事以母
 老乞歸著述甚富其尚書啟蒙一書已採入

欽定書經傳說彙纂于志

徐鷓字鳴川號前峯嘉靖丁未進士初任常州府教授己
 酉充江西考官升南京工部主事監稅儀真所立規條
 商民稱便轉刑部郎時巨闖毀孝陵封木屬鷓勘治行
 千金祈緩二日援者至鷓即日具獄詞當大辟其持正

類此出守肇慶府創一條鞭法遷湖廣兵備副使解組後築室曰清溪小隱歌詠其中謝絕塵事卒年七十有

七祀鄉賢少子九牧善繪事

吳志

王大猷字伯甫性耿介遇凶歲餽粥不具縣令魏公遺之金不受嘉靖丁酉舉人丁未進士授官中書舍人儵邸委巷跨一欵段了公事歸輒閉門謝一切裘馬游即同里撫要謁籍終無其名晉工部員外郎出僉廣東按察尋改備兵雲南又改廣西方陞辭中人言罷家居埽軌

避俗蕭然終窳

海鹽縣志

劉熠字元麗父模英山學諭熠受業鄭曉舉嘉靖庚子鄉

魁署休甯教諭徵為南御史尋卒著同春堂彙

以上海鹽圖經

胡憲仲字文徵嘉靖庚戌進士俺答犯京師至白河憲仲上議請溝都城外地亟垣之護關民廬舍招勇敢士令貴戚大闢出蒼頭私屬助軍設伏天壇貴人大莊諸處倚角制勝兵部大臣宜躬擐甲胄出視師毋堅閉國門自弱通州關外及張家灣壯丁皆招集為兵自衛若敵犯都城躡其後去即邀擊之為欵几十且請自當一面禦敵得報以憲仲協巡九門督追戰守器具時當事倉皇版築之役不及興寇退關廂殘築外垣保護壹如憲仲策授南刑部主事值倭又擾浙中南都戒嚴南樞部

謂憲仲曩在北策備敵是知兵因使守太平門憲仲貽書浙帥言備倭策三一籍沿海船責令盡歸毋出海以絕其源一禁內地姦民無資糧漏師以困其進一遣間諜懸重購令各觫自相擒併以翦其黨帥臣用之又大驗在官二年卒有胡比部詩文集行世

馮皋謨傳

馮皋謨字禹卿嘉靖庚戌進士授主事擢御史時嚴嵩私人柄用者謂必詣彼謝不往嵩怒出為江西按察司僉事詣嵩第皋謨竟南面坐嵩愈怒會其舍人橫行里中捕笞之枷示通衢改廣東參議分守惠潮賊張璉據饒平西聯大埔蕭雪峯程鄉林朝曦流劫閩廣與倭及海

寇互相犄角皋謨與督府張臬商畧制禦張盡以兵屬之于是海寇林道乾許朝光王伯宣等聞風來降時倭與官兵相持三河久皋謨令伯宣將精兵所至招海上賊益之至三河從山後登高處吹蘆發哨倭入舟擊之殲焉明年復集水陸師一萬于廣州皋謨用賊間襲蕭雪峯擒之璉窘乞撫急攻遂擒璉悉降其餘黨時朝曦以官軍非有意即攻不設備密使謀致賊酋曰能擒朝曦獻他勿問酋縛朝曦獻賊盡平上功嵩益怒追論王伯宣賊首不宜以功宥卒斬之皋謨不得優敘遷福建參政嵩又嗾御史擴廣事劾之奪職歸

嘉禾徵獻錄

馮嘉謨字猷卿皋謨弟由上舍選授銅仁府幕郡在萬山

中與苗雜處民與苗互市得贏物賈價而利歸市魁嘉

謨設法平之苗感激後黔帥以事襲殺苗苗憤羣擁侵

境嘉謨馳單騎諭之退

海鹽縣志

劉价字元白朮子嘉靖庚戌進士歷官撫州守值鄰寇初

退簡兵保穀拊循瘡痍築崇仁樂安宜黃三城修千金

堤禦水佐俞大猷戚繼光等擒大盜曾一本多勞績价

至孝痛父不遂養事母曲意承歡居喪毀幾滅性忌日

衰經坐冢旁泣守至暮始歸門闈之內肅若朝典

海鹽縣志

參兩浙名賢錄

湯彬字子宜父誥博學能詩文彬少孤事後母屠曲盡孝

敬嘉靖丙辰進士令廬江進職方郎僉河南按察荆隨

巨寇桂六等流劫蔓延擐甲視師俘斬二百餘河洛以

安方上功而中忌者言歸

嘉禾徵獻錄參海鹽圖經

陳所學字行父嘉靖丙辰進士授給事中出為河間知府

罷歸浙撫欲薦之不起子昌明字季勉以選貢任忻州

同知監甯武關值山寇擾亂昌明單車入賊巢諭以大

義悉投戈乞降

海鹽圖經參吳志

朱學顏字榮峯祖璫以茂才入成均好施予敦內行學顏

稟家法登嘉靖辛酉鄉榜乙丑進士授潛山令濬別郵

傳宿弊條陳宜興革者十二事旋以事件上官量移雷

州府同知遂歸隱朱氏先婺人也元晦家建陽次子雷

發十二傳名順者嘉定間任海鹽簿

遂居聞琴橋因占籍子銘教授潮陽孫懋卿學正遷尚

胥里又四傳曰銳生三子溥瀚洪各負才行舉孫十曾

孫二十族始日蕃朱氏之登進士自

學顏始其後科第連綿甲於一邑

鄭履瀄字叔初曉子嘉靖壬戌進士除刑部主事遷尙寶

丞隆慶三年疏言最急莫如用賢陛下御極三禩矣曾

召問一大臣面質一講官賞納一諫士以其畫思患豫

防之策乎高亢睽孤乾坤否隔忠言重折檻之罰儒臣

虛納牖之功宮闈違脫珥之規朝陛拂同舟之義回奏

蒙譴補贖奚從內批徑出封還何自紀綱因循風俗玩

愒功罪罔核文案徒繁闈寺潛爲厲階善類漸以短氣

言涉官府肆撓多端梗在私門堅持不破伏願奮英斷

以決大計勿爲小故之所淆宏濬哲以任君子勿爲嬖

昵之所惑移美色珍奇之玩而保瘡痍分昭陽細務之

勤而和庶政以蠻裔爲關門勁敵以錢穀爲黎庶脂膏

經史講筵日親無倦臣民章奏與所司面相可否萬幾

之裁理漸熟人才之邪正自知疏入帝大怒杖之百繫

刑部獄數月刑科舒化等以爲言乃釋爲民神宗立起

光祿少卿卒明史

顧霑字少雨少孤嗜學母莊紡織以資燈帷嘉靖中成進

士知禹城調閩縣有闡使暴橫力抗之歷南兵禮二部
郎知撫州調柳州進領閩都轉運方擬參廣藩前卒

海鹽志

嚴守中字一之由武魁歷任昌國備倭欽總昌衛地逼海

洋守中素負才畧精陣法訓練士卒水陸防禦威望遠

播泣任五載海氛肅然尋陞山東都司僉事書

于志

毛儲元字伯善其先海鹽人坐累謫常德衛軍父鳳岐以

衛籍中正德丙子湖廣舉人知贛縣儲元舉湖廣嘉靖

乙卯鄉試知延川縣建城禦敵關中有鐵延川之名遷

揚州府同知乞休歸

嘉禾徵獻錄

楊學詩字可言精騎射通音律書畫嘉靖甲寅倭警有司

聘以禦守多所贊畫三試武科咸舉於鄉至老持弓矢

躍馬輕捷如少年時所著有兵法通鑑策論諸書

海鹽縣志

顧所有字謙叔隆慶庚午舉人署休甯學官擢宜黃令奏

捐雜賦又置社倉十三儲穀八千有奇以防水旱祀名

宦

海鹽圖經參吳志

鄭履準字叔平曉次子以蔭歷順天治中擢南刑部郎中

有僕盜主財捕急而刎者坐其主逼死律立出之一惡

少姦孀婦而室之逐其前子不得自經死所司抵子重

辟為駁曰同居者有繼父姦合即非繼父也與末減豪

弁盧受賄獄諸公力爲請卒論輸城且執法不撓又如

此海鹽圖經

劉世埏字敬修烱子萬厯丁丑進士授刑部郎中時以波

累繫獄者至數百人世埏悉釋之又著酷吏論爲同曹

警弟世教字少彝由舉人爲閩清令決疑獄數十署尤

溪卒于官著有研寶齋稿吳志參靜志居詩語

許聞造字長孺父相卿自海甯家海鹽聞造以萬厯丙子

舉南闈歷河間東昌推官選授貴州道監察御史在職

敢言糾彈無所避初以東封事論劾石星欺罔誤國論

止礦稅上書責趙用賢依違不能引救出按甘肅勘罰

西甯諸帥賓酋遠遁議築山寨以固莊浪以北還以轉

餉事劾諸大臣忤魏廣微判尙嵐州告歸嘉禾徵獻錄

鍾北斗字秉文韶子萬厯壬辰進士仕中書出典黔試擢

給事中多所建白諫止礦稅一疏備言民役之苦剴切

無諱轉外予告歸海鹽圖經

謝子貞字吉甫起家掾吏丞嘉定察獄著能聲有馬某者

家六人盡被殺令捕其仇周某者子貞曰安知非仇于

馬亦仇于周者爲之廉得有沈某考有血衣左驗竟怖

服自是吳中疑案上官悉下鞫訊晉丞京邑致仕性好

讀書給事掾曹時披覽史漢攻苦如諸生子錫教字洪

伯萬歷丁酉舉人歷官德州知州歲饉代民償逋賦數千顧大年以白蓮倡教聚眾為亂錫教討平之擢長沙

同知海鹽圖經參吳志

楊春芳字子含邃於經學善屬文由舉人授巴東令有廉

聲時集士子講論詩文竟日不倦號為儒吏吳志

沈孝徵字元萬萬歷戊戌進士歷官汝南道副使錄囚信

陽有周某者奇其才釋使就試是年中式誅境內巨盜

坐忤上官歸著有元暢閣集弟誼徵以諸生入國學授

山東按察司經歷歷鳳陽府通判流寇充斥鳳督朱大

典愛其才檄為軍前贊畫以勞歿有香雲庵稟閒閒集

嘉禾徵獻錄

王永相字維樞萬歷戊戌進士任刑部郎時有閹縛人馬

足馳曳至死者力請于上誅之王子典黔試以勞瘁卒

于官吳志

徐天麟字仁卿萬歷壬子舉人授三河教諭後知邳州民

有生理其妻者天麟夢來訴冤往瘞所發視尸猶含淚

如夢中見地接蠻笮前守不能戢傳檄諭之皆就撫論

罷歸嘉禾徵獻錄

鄭心材字敬中履淳子以祖蔭拜督府都事歷應天治中

劉天緒之獄訛言謀反訊者欲借為功心材止按坐渠

首取天緒所募名姓籍悉焚之全活甚多修家規立宗法置義田贍學及族人嘗自序行不求人知之善讀有益世用之書

海鹽圖經

曹嘉謨字廷述萬曆辛卯舉人授羅山令俗好訟嘉謨從容語之曰忿可忍網不可觸也人多感悟以忤上官意

左謫羅人祠祀之

嘉禾徵獻錄參吳志

崔培元字孟辰萬曆乙卯舉人知青陽縣青陽劇邑姦叢其中田畝不均培元設法釐正下戶賴之勒石誌德薦紳豪強多不便其所為構蜚語中之罷歸著有橫山草堂等集子長錄諸生力學好義歲饑貫貧民田租貸粟數百石竝招其人來倒篋出券焚之

池州府志參彭孫遜墓表

陸鼈來字巨元登癸酉鄉薦判泉州晉思恩同知歸無贖

俸

海鹽圖經

吳中偉字生白系出天台胡氏洪武初城石帆村曰激浦始遷祖忠因家焉易姓吳中偉萬曆戊戌進士授刑部員外郎督貴州學政攝貴陽兵備威清毛口土司相仇殺檄召數責之進廣東按察使香山島夷築清城窺內地中偉馳檄諭諸番毀其城遷布政入為光祿卿魏忠賢從子良卿為丞入謁中偉坐受之大慚恨會甯遠告急以副都御史治兵薊北忠賢尋得偵騎告圍解者忠

賢益怒宰相畫名掌中密諮忠賢曰是落落士也殺之
無名忠賢良久曰不如爲好語錮之遂詔褒清恬可嘉
加刑部尙書致仕去上設朝問白鬚侍郎何在左右對
以實帝爽然移時

嘉禾徵獻錄參
海鹽續圖經

彭宗孟字孟公紹賢子萬曆辛丑進士選朝城縣有訟鬪
毆將斃者宗孟鞠之知與宦室蒼頭鬪其兄重繫之利
弟死挾詐治兄如律調滕縣福建貢茶入都倚大璫勢
夫馬逾額裁之棄茶走愬璫禮部移書東撫必坐罪邑
尉宗孟不可考選入都滕民爲之祠後白蓮賊陷滕榜
祠下戒毋犯好官祠旋巡按湖廣膳田多派楚省額數

不足部檄括廢藩產宗孟疏爭括地非祖制奉旨切責
再上疏奪俸司道懼欲加楚賦以充額宗孟曰異日就
封者以爲例楚賦將日重使者甯以身任責三上疏爭
之神宗稍悟終不加譴乙卯楚增解額藩司請加徵宗
孟力阻是年各省俱加賦楚以宗孟故獨否以親老乞
歸子四厚廣以德行文章著被兵卒長宜期生有傳

海鹽
圖經參
吳志

徐從治字仲華萬曆三十五年進士除桐城知縣累官濟
南知府遷兗東副使駐沂州徐鴻儒反鄆城連陷鄒滕
嶧縣從治請起故總兵楊肇基主兵事獻搗賊中堅之

策遂滅鴻儒錄功進右布政使督漕江南妖賊再起巡撫王惟儉奏畱從治仍守沂以議不合歸崇禎初以故秩飭薊州兵備薊軍久缺餉圍巡撫王應豸於遵化從治單騎馳呼曰給三月糧趣歸守汛地否將擊汝眾應聲散進秩左布政使再請告歸起飭武德兵備孔有德反巡撫余大成檄從治監軍馳赴萊州而登州已陷大成削籍遂擢從治右副都御史代之與登萊巡撫謝璉竝命與璉同受事于萊而有德已傳城下環攻不舍晝夜從治激厲將士多方守禦殺賊無算是時兵部尙書熊明遇惑大成撫議命主事張國臣與從治及璉為賊求撫抗疏極言和講之害於是廷議更設總督一人以兵部右侍郎劉宇烈任之宇烈無籌畧曰議撫從治堅守待救相拒凡三月中飛礮死萊人皆哭從治既死而宇烈亦以兵潰被逮詔贈從治兵部尙書賜祭葬蔭子建祠曰忠烈我

朝嘉慶二年追諡烈愍

明史傳參吳志海鹽續圖經

徐同貞字伯園從治長子諸生從治殉難萊城因襲錦衣衛中所戈戟司尋陞都指揮僉事時大獄屢興北司案牘力為平反積勞成疾乞歸甲申畱都起錦衣衛堂上僉書都指揮同知是時馬士英嚴刑峻法同貞秉正不

阿遂以病乞休順治年巡按王應昌舉地方人才巡撫秦世禎推賢良方正俱以老病不赴康熙初舉郡邑鄉

賢

海鹽縣志

許士奇字雅正萬曆癸丑進士授黃州推官陞成都知府奢崇明亂後百里稀人煙士奇抵任弔死扶傷與民休息凡四年生聚如故陞下川南道副使駐瀘州奢巢雖覆尚走險自保倚水爲犄角制府檄士奇搗蘭以援黔斬賊首數千搆離其黨與遂殄滅之陞湖廣按察使己巳都城被圍將楚師入衛條上兵事陞布政使備兵松潘同事忌之中以考功法罷歸

嘉禾徵獻錄參海鹽續圖經

胡震亨字孝轅爲諸生卽以經濟自負萬曆丁丑舉于鄉知合肥縣吏治之餘畱意韜鈴嘗與劉綎論兵綎心折時議舉邊才不果崇禎季年薦補定州知州擢員外郎乞歸藏書萬卷日夕搜討凡祕冊僻本魯魚漫漶者無不補綴揚權所著有續文選唐詩統籤靖康咨鑒錄諸

書

浙江通志

沈宏遇字際可萬曆戊午舉人知湖廣石門縣縣故民糶雜處風俗頑悍宏遇悉心撫綏徵息訟百姓安之丁未行取會母喪聞訃歸服闋除信宜令興學校均徭役歲饑設法賑濟全活甚眾陞邳州牧引疾歸卒祀鄉賢

于志

朱士容字汪千歲貢生授鄞縣學訓導遷安吉州學正州故僻在山隅無與鄉薦者士容至勗士敦行嚮學使各自矜奮于是州士徐炳文始登賢書焉于志

陳謙字廷益貢生由部曹出守萊州釐姦剔弊綱舉目張防海則設團練之法治河則仿竹落之制以及建倉貯穀構廠校士重修府志皆捐重貲引疾歸田得張甯故居經營布置俾一笑山復舊觀又購莊於西湖段橋東乃董文敏別墅因懸文敏所書浣雲館於閣而以就莊顏其門著有詩古文若干卷海鹽縣志

彭宗周字于德紹賢子兄宗孟起家文吏讓宗周襲海甯衛指揮同知掌衛印管屯田事免扣軍條城銀以屯糧餘耗充之歷溫處北洋遊擊陞廣西潯梧副總兵致仕宗周起橐鞬工書札有儒將風袁志

彭期生字觀我宗孟子萬歷四十四年進士崇禎初為濟南知府坐失囚謫布政使照磨量移應天推官轉南京兵部主事進郎中張獻忠亂江西遷湖西兵備僉事駐吉安吉安不守走贛州加太常寺卿仍視兵備事城破冠帶自縊死

國朝乾隆四十年

賜諡節愍

欽定勝朝殉節諸臣錄參明史楊廷麟傳

彭長宜字德符崇禎癸未進士授上海令值歲荒豪奴肆

劫吳中撫道發兵屯海上長宜至申臺司請徹兵其以

黨亂相訐告者皆下縣審保全甚眾民間逋賦數十萬

次第清其乾沒盡卻耗羨無錙銖盜俸入不敷載米家

中以自給南都失守解印歸悲痛不食扼吭而卒于志

劉渾字爾濛燭曾孫家貧與從弟泓寒餓讀書夏常無帷

帳解單裙連接障之伊唔不輟萬曆丙午舉于鄉知永

明縣時張獻忠寇掠充斥邑控西粵阻險林箐中多蠻

獠善格鬪渾以財物賂其酋使為我用寇逼舉烽羣蠻

絡繹山谷跳刀為前行渾率鄉勇乘城鼓之又募士夜

溝其地作塹寇多陷其中終渾任不敢犯

劉泓字止澄燭曾孫萬曆己未進士授營繕司主事出督

夏鎮察覈河工錢糧不下數十萬封貯官庫以艱去服

闕詣京疏暴崔文昇督兩淮鹽漕驕橫之害起兵部郎

中出為淮徐副使徐當河決之後盜賊蜂起泓禽其渠

散脅從者開濬馬陵山駱馬河口等處漕艘銜尾輓輸

無淤淺之患致仕歸以上嘉禾徵獻錄

俞之策字坤名萬曆壬子舉人授福甯州守值寇亂後極

意撫綏嘗捐俸賑饑民賴以活陞刑部郎中著有海樹

堂集 吳志

朱國華萬厯壬子解元厯官刑部郎中時吏治嚴急封疆

諸案大吏多坐辟國華初讞坐失出逮繫死獄中 海鹽續圖

經

虞廷陞字乾陽先世有名勲者自杭遷鹽天順乙卯舉於

鄉母喪摧毀商文毅有哀輓詩父紹唐字憶蘭事節母

至孝崇祀鄉賢廷陞於萬厯乙卯丙辰聯捷為徽州府

推官攝郡及縣贖鍰一無所入修城積穀賑貧飯囚咸

給於此分較南闈得侯峒曾夏嘉遇皆名著當代以卓

異被徵丁母憂服闋補工部給事中巡視皇城京營巡

省節慎庫孜孜公務無不悉飭風裁自持中璫不悅黃

山之獄株連者眾廷陞駁正不撓挽救良多璫禍益烈

廷陞昌言申論諫削奪請焚點將錄天鑒錄一時服其

忠讜京營請為魏忠賢建祠嚴拒之不聽遂不署名忠

賢積怒部疏題典試山東矯旨廷陞久係門戶削職追

奪誥命崇禎初錄黨錮諸臣復職陞吏科右給事中轉

兵科右給事中冊封徽藩聞父喪歸南都再起廷陞為

吏科左給事中奉命典試江西未行江甯不守歸里遁

跡村居年七十卒 海鹽縣志

朱泰禎字道子萬厯丙辰進士授福建龍巖令淫雨山水

暴崩發官粟賑饑民築城民無流亡擢福建道御史巡按雲南水西東川烏撒三大寇數十萬犯霑益守兵僅六千人泰禎董率道將擊走之斬首數千未幾水蘭烏復入滇泰禎迎擊之先設伏以待賊且行伏起中斷之賊殊死鬪諸軍驅象橫擊之賊潰遂擒童戈資俘斬之築石壘於城旁炎方立銘紀功焉父喪歸服闋補御史遷南兵部主事

袁志參海鹽續圖經

顧可漁字泰蛟歲貢任德清訓導陞南雄府教授振興文教庠序之士翕然敬從晚居鄉人推耆碩既卒門人私謚貞靖

祖重煜字函三萬歷己未進士官行人天啟丁卯分校北闈崔呈秀子鐸卷在重煜房塗乙之崇禎初考選工科給事中請卹被黨禍御史周宗建中官嫉之厰員刺其問醜者與主事王郝俱下獄論戍遂坐廢崇禎十年命復重煜官旋卒

于志

吳麟瑞字思王萬歷己未進士授常州府推官妖人葉朗生馬道人煽亂吳越郡豪陳鼎陰結亡命以應麟瑞計禽亂首誅之反側始安累遷九江參政因流寇擾江楚駐節袁州謂流寇皆吾民有司不能拊循激之為賊擢布政使作瞽論萬言極陳時政之弊告歸薦起偏沅巡

撫時三楚已陷麟瑞破家募勇士千餘人促裝就道至
沉兵已并鄖撫矣遂回籍聞弟麟徵殉國難痛哭作自

祭文卒以上海鹽
續圖經

吳麟徵字聖生天啟二年進士除建昌推官父憂歸補興
化府崇禎五年擢吏科給事中章數上直聲甚著乞假
葬父歸久之還朝劾吏部尙書田唯嘉贓污罷去十七
年春推太常少卿賊薄京師麟徵守西直門以土石堅
塞其門募死士縋城襲擊之賊攻益急麟徵趨入朝欲
見帝白事至午門魏藻德引之出遂還明日城陷乃入
道旁祠作書訣家人曰祖宗二百七十餘年宗社一旦

至此雖上有亢龍之悔下有魚爛之殃而身居諫垣無
所匡救法當褫服殮用角巾青衫覆單衾以志吾哀解
帶自經家人救之甦請待祝孝廉至一訣許之孝廉名
淵嘗救劉宗周下獄與麟徵善者也明日淵至麟徵慷
慨曰登第時夢隱士劉宗周吟文信國零丁洋詩今山
河破碎矣不死何爲酌酒與淵別遂自經淵爲視含殮
去贈兵部右侍郎諡忠節

國朝

賜諡貞肅方賊之陷山西也蘇遼總督王永吉請撤甯遠吳三
桂兵守關門選士卒西行遏寇卽京師警旦夕可援天

子下其議麟徵深然之輔臣陳演魏藻德不可謂無故
 棄地二百里臣不敢任其咎麟徵復為議獨疏昌言弗
 省及烽煙徹大內帝始悔不用麟徵言旨下永吉永吉
 徒甯遠五十萬眾抵豐潤而京師已陷矣城破八門齊
 啟惟西直門堅塞不通集民夫發掘乃開明史

曹履泰字大來嘉謨子天啟乙丑進士授同安令海寇紅
 夷交訂邑無兵乃編漁民為伍團結村落相應援賊不
 敢犯督撫熊文燦受李魁奇鄭芝龍降城中震恐履泰
 開城門出入如平時芝龍部下卒橫行履泰輒以法繩
 之未幾李魁奇挾鍾斌叛去履泰搆斌使叛魁奇令芝

龍招斌合兵圍魁奇擒斬之擢吏科給事中海寇既平
 疏陳閩事請選將練兵勿獨倚鄭芝龍為長城舉朝駭
 愕又疏糾吏部李希揆躡等典銓希揆嗾大瑞王永祚
 誣以事罷官子元方進士嘉禾徵獻錄參海鹽續圖經

方戡之字耆定以世官擢南京都司歷陞金山參將備禦
 有方參議范允臨為文立碑紀其功遷臨沅副總兵安
 奢二酋梗滇黔戡之合副將袁善兵直衝之賊大潰斬
 首四千級遷漳泉副總兵將舟師逐鍾斌合鄭芝龍烏
 尾船圍之斌沈海死尋以老病乞歸嘉禾徵獻錄

趙敏學字太元天啟辛酉舉人四川儀隴令陞辰州府同

知官貧不能治裝僑居邑流賊入省城楚蜀路斷儀隴之民爭匿敏學深山中久乃得歸布帽敝袍炊煙時斷年九十卒

海鹽續圖經

馬孟驊字同伯以世官歷淮徐副總兵南京前軍都督僉事海寇劉香流突浙閩以原官改浙江鎮守督兵出海劉香敗死於閩其父鳳以餘眾詣孟驊降進都督同知

鎮浙六年以老歸

嘉禾徵獻錄參袁志

吳文憲字萬為副貢授衡州府通判彊直不撓單車解散廣場礦賊四五千人以輕兵授桂陽御寇二萬餘眾董桂殿工與內官抗禮為所中逮刑部獄事終得白平生

博綜掌故里居均役救荒白糧修塘諸條畫皆有裨地

方著有師陶集

袁志

許令瑜字鍾叔間造孫崇禎癸未進士知仙遊縣國變棄官歸子齋有志節晦蹟著書有鐵函子集

嘉禾徵獻錄參袁志

曹憲來字九真丙子充貢憲來敦氣誼賀吏部燦然建言幾廷杖燦然母招憲來以後事為托就職為肇慶府通判畱妻子侍養子身之官清屯釐蠹軍民悅服旋丁父憂捐俸補稅虧額徒跣登舟終喪不復出卒祀鄉賢子四從外祖陳懿典姓為陳愨恂恂恪恂子莢康熙中舉

博學宏詞不赴

袁志參海鹽續圖經

湯雲章字耀之諸生忼慨有大節莊烈帝崩金陵失守嘉興人起事奉陳梧為主帥海鹽參將周一誠遣兵五百人至雲章協守西門相拒三十九日城陷不屈死子芬崇禎癸未進士分守福興泉三府布政司參政興化破緋衣坐堂上被殺子麟字千里匍匐抵閩扶櫬歸葬麟於康熙間以例貢授廣西向武州吏目為土司害無嗣有女九歲聞父變即面縛奔控撫軍卒復父仇扶柩歸雍正間雲章人忠義祠有司致祭芬於嘉慶二年追諡烈愍

袁志參海鹽續圖
經勝朝殉節錄

徐一源字宙孟以國子生授歸德衛經歷署考城縣陞歸

德府通判崇禎十三年闖賊攻歸德甚急一源分守城北多所斬獲城破猶巷戰力屈罵賊死詔褒卹即死所立祠子元松字木公以賢才徵不出嘉慶二年追諡一

源烈愍

嘉禾徵獻錄參海鹽續圖經勝朝殉節錄

崔文榮海甯衛人世指揮僉事舉武會試授南安守備崇禎中臨藍盜起逼桂陽桂王告急文榮督所部會勦卻賊四萬人以功擢武昌參將張獻忠犯漢陽文榮渡江襲斬六百級已而城陷武昌震懼巡撫宋一鶴既死承天新任巡撫王聚奎未至武昌素不宿重兵城空虛或議撤江上兵以守文榮曰守城不如守江團風煤炭鴨

蛋諸洲淺不及馬腹縱之飛渡而坐守孤城非策也當時不從賊果從團風渡江營樊口文榮軍洪山寺扼之既斂兵入城以他將代守賊全軍由鴨蛋洲畢渡抵洪山守將亦退入城文榮以武勝門當賊衝偕故相賀逢聖協守賊攻之不能下監軍參政王揚基時已擢巡撫承天德安二郡未間命向駐武昌與推官傅上瑞詭言有事漢陽開門遁去先是楚王出資募兵應募者率斬黃潰卒及賊間諜至是開文昌保安二門納賊文榮方出關還闔城扉不及躍馬大呼殺三人賊攢槊刺之洞胷死

國朝乾隆四十年

賜諡忠烈

節處

明史參新纂 案文榮死妾郭氏攜一子兩女赴河死僕婢從者六人楚人于鳳凰山石誌曰崔將軍盡

沈允芳字隆生崇禎戊辰進士授工部屯田司主事督修桂府將告成聞父喪桂藩欲奪情奏畱允芳慟哭殿下聲徹宮中寢其奏起補營繕司主事出為淮海兵備副使鳳陽殘破後淮泗白骨遍野允芳勞徠安集之除淮海道加參政管漕儲道事旗丁毆傷秀水縣令言于漕撫檄斬倡亂者五人旗丁之橫始戢罷歸卒

嘉禾徵獻錄參袁志

陳于王號去非以明經考授州判歷任廣西平樂荔浦脩

嘉興府志 卷五十六
仁縣尹陞永安州守居官十餘載不事煩苛任平樂時
有李勝兄弟七人爲理刑誣以大辟于王按之得不死
比歸焚香頂祝載道路

錢應晉字次卿琦孫崇禎丙子舉人授邯鄲教諭邑患雨

災代陳蠲秋糧陞蓬州知州以病歸著有蜀游草江行

雜咏閩風諸集

以上海鹽續圖經

錢嘉徵字孚于天啟辛酉中順天副榜魏忠賢盜執魁柄
眾正荼毒殆盡會崇禎改元嘉徵憤然抗疏列璫十大
罪一曰竝帝二曰蔑后三曰弄兵四曰無君五曰刻剝
六曰無聖七曰濫爵八曰掩邊功九曰朘民財十曰通

關節語具載明史疏上帝召忠賢至手嘉徵疏付侍臣
當御讀之忠賢伏地叩首不能對乃降旨魏忠賢事廷
臣自有公論朕心亦有獨斷青衿貢士不諳規矩本當
重處姑饒一遭上書時或爲阻之嘉徵慷慨言曰虎狼
食人徒手亦當搏之舉朝不言而草莽言之以爲忠臣
義士倡雖死何憾自是言者相繼忠賢誅死

靜志居詩語參

錢泮字雍頌舉人慕奇節與人交不能容人過久而彌篤
年十九隨父嘉徵入京嘉徵首疏擊魏忠賢屬泮奉母
南還避禍卒不去亦無患從劉念臺講學志節益勵肄
業南雍時阮大鍼以詩詞權術傾動畱都泮與同志協

力擊之幾及禍歸卽杜門不出

伊志

李毓新字喬之號雲岑先世隱居鹽之苞溪遂爲海鹽人
毓新始卜居郡城崇禎乙亥拔貢入北雍舉丙子順天
鄉試丁丑成進士己卯除潮陽司李鞠獄明斷上官器
之命攝四篆兼察三府潮郡鹽稅多羨額革之不名一
錢歲饑富家遏糴爲之嚴匿米法癸未惠潮間多山寇
總制沈猶龍檄監紀軍務毓新條議勦寇十二策所向
奏功隨建議築城豐順以其地當閩粵交相度營築屹
爲重鎮冬署肇慶府篆時楚寇賀寇攻破開建縣肇郡
震動詔調閩兵來援恢復開建隨合兵西粵五路進勦

不閱月賊首就擒餘黨悉滅惠藩避亂自粵西來奔護
衛不戢居民罷市肇兵幾與藩兵格鬪毓新徒步行間
至誠調勸迎王入城肇賴以安未幾閩賊姜世英突入
黃岡攻饒平大埔潮郡郡被圍制府檄毓新監參戎趙
干馴軍前鋒至惠來縣賊聞風遠遁潮圍得解卽移師
駐揭陽計擒世英潮境悉平捷書入奏列毓新首功書
名御屏特旨行取正啟行而北都陷矣毓新請帥兵勤
王數上不允至南都授兵科給事中屢上封事忤馬士
英意不報時淮陽告急而上游左良玉傳檄欲埽清君
側之姦率兵東下士英大恐調兵回禦毓新與大理姚

思孝同官吳适主守河淮士英益怒改命巡江實無一兵未幾南都亡遂歸禾與故宰徐石麒相約殉身會郡中起義城破死之仲子庠生禎先抱父屍同死

國朝乾隆四十一年追諡毓新節愍

海鹽縣志

錢澗徵字侗庵十歲補博士弟子崇禎己卯舉鄉薦生平寡言笑重廉節布衣蔬食晏如也辛巳歲祲上救荒六議全活無算晚年絕意仕進築蒿園于蘆溪自為生壙日徜徉其間著有大政廣考啄紅集代獲抄

袁志

虞贊堯字亮工崇禎癸未進士授潮州府學教授潮陽陷

殉難死

于志

馮時敏諸生明亡殉難

于志

鍾韶字問叔歲薦諭公安端重有雅量喜道學家言輯辟陳胡王四氏語錄訓人又撰論語逸編若干卷嘗述父梁遺訓為詩誠子孫剴切可誦

于志

吳蕃昌字仲木貞肅次子崇禎甲申貞肅殉國間行迎喪歸遂絕意仕進師事劉宗周作日月歲三儀以自範為闔職三儀範其家有貧者鬻女贖歸養為己女母喪水漿不入口四日比葬嘔血數升逾小祥卒

吳謙牧字哀仲整身修行期為聖賢之徒每語人曰枉道以免辱其辱更甚枉道以求勝其負更甚君子不以一

朝之忿一日之難而喪終身之節父歿扶病治喪葬哀
動行路體素羸不勝哀毀卒于喪次

以上袁志參
海鹽續圖經

朱學道字少南國學生有醇德持躬謙謹鄉里多化之深
於理學不言而躬行崇祀鄉賢配享文公祠

陸廷錫字雲來幼入邑庠抱經濟才議築海塘倡修學宮
凡地方利弊抗辭不避勞怨居家孝友

國朝康熙元年舉鄉賢

海鹽縣志

錢汝霖本姓何原名青字雲士隱居澈湖學者稱為商隱
先生幼孤事母孝歲饑米石銀四兩汝霖儲米可買田
百畝人勸之糶不應盡以所儲遺親黨後又旱米驟貴

或又以糶勸曰奈親戚需以舉火何復盡散之生平躬
行實踐至耄不衰桐鄉張履祥見聞錄載之甚詳

李自明字先修號少白徙居嘉興梅會里以廩貢成均崇
禎戊寅謁選除揚州府廣文課士嚴明甲申聞京城陷
勺水溢米不入口進諸生激以大義皆感動未幾淮上
失守官屬宵遁自明身攝數篆視事如常時史可法兵
敗郡城失守與幼子鳳侶對縊官署中所著有謫仙居

橐

海鹽縣志

朱茂明字循默諸生事親以孝聞讀書能窮理盡性教學
者以陸象山之主靜辭文清之實踐著有四書心解尙

書微修身要言自怡悅詩草崇禎間祀鄉賢

海鹽縣志

國朝

胡季瀛字子甫震亨子順治戊子副貢歷官姑孰守厲廉節杜干謁有遺蘭數盆啟之皆金也受蘭返金轉九江守時三逆萌孽兵燹之後民皆散亡季瀛勞來撫綏輯甯吏民甫一歲而州大治以母憂去

朱宗文字迎陵為諸生慷慨敢言以發糧胥苛派姦胥陷以他事下獄不少挫得直始出獄順治戊子薦浙榜為餘杭教諭攝餘杭縣事治辦有聲馳救民間失火大樹折壓幾死

海鹽縣志

朱挾鏃字四如順治己丑進士知臨湘縣縣治燬於兵戶口寥寥以民居為衙署捐俸營造公署不費民間一錢招集流亡漸成井落以執法為豪右所中罷官歸里寄情詩酒著蓬壺軒橐

海鹽縣志

陸韜字保光力學好修事母以孝聞葛寅亮講學西河韜負笈從之名著四方學行足為後進楷式順治三年由恩考授知縣不赴著有豹蔚堂集五經千腋等書

于志

費度字二裴以貢授湖州府學教授陞文昌縣知縣招撫流民降山賊潘宗璉周隆等地瘠兵戍供億不時以勞卒于官士民祀之

以上海鹽續圖經

查培繼字王望順治壬辰進士知廣東東莞縣歷兵戶刑
 三科給事中章疏數上如清關弊行官兌禁鷹戶等疏
 皆關國計遷江西按察副使分巡饒九南道時寇亂初
 靖力事拊循尤以興學校敦教化為首務建義塾禁淫
 祀慎蘆課扞水患賑饑民捐修白鹿洞書院時與諸生

講學多所造就

浙江通志參
海鹽續圖經

查詩繼字二南號樊村為諸生會鼎革中順治甲午舉人
 晚令霍邱土瘠民貧上官督催科甚迫詩繼革去火耗
 加意撫字讀元道州春陵行有感作詩見志曰民命真
 當惜守官良獨難不因兩歲緩那得一州安署考甘中

下臨危耐錯盤心肝奉宸極畱向御屏看未三載乞休

歸年七十一有樊村集

海鹽
縣志

徐炳雲字三孺由舉人除武義教諭代諸生償逋賦數百
 有貧不能舉火者周之至傾囊弗靳武義士夫肖像祠
 之吳志

徐升貞字君階昌治子由拔貢補岳州通判蔬食布衣居
 官如貧素嘗泊舟新河暮有二虎躍入舟升貞叱曰莫
 傷吾吏民虎曳尾去歲旱步禱淚痕被面兩釋冤獄人

號活命菩提

湖南名宦冊參
海鹽續圖經

張惟赤字螺浮以進士授戶曹郎擢給事中知無不言歲

條奏數十上嘗一日疏五上出爲京南道以裁缺回籍
有利于邑者力行弗倦後以刑垣召尋遷工垣以疾卒
其在工垣時三逆不靖軍需孔亟或計履畝加賦之法
惟赤力爭以爲不可由是民間賦稅得循舊額著奏議
若干卷子皓字小白康熙壬子舉人爲中書遷主事性
至孝母陳病日皓每蚤起舐之先是惟赤有議賦一疏
皓以入告得如議

許全臨字靜庵進士授昌邑令清歷年逋賦捐資給牛種
開墾荒地三萬餘畝邑多逃旗株連立自首法隨緝隨
解民以不累以疾卒于官

彭孫貽字仲謀博聞彊記推官陳子龍奇其才薦之主司
已定第一人病不竣試父期生死難間關兵燹冒白刃
求遺骨有江右義士負骸送歸乃杜門奉母終身布衣
臨卒曰我不卽從太僕公死者以母老兄病耳今不得
終養存歿兩負有愧我二弟遠矣弟麀孫子習皆殉父
難孫貽卒私諡孝介著有流寇志茗齋詩文集邑乘雜
著若干卷

以上海鹽
續圖經

彭孫適字駿孫順治己亥進士官內閣中書康熙戊午開
博學宏祠科大學士吳正治以孫適薦取中第一初授
編修累官吏部右侍郎銓曹事例冗煩絕苞苴杜請託

一時清譽推之致仕歸圖書數兩而已工詩詞與新城
王士禎齊名時號彭王著有松桂堂集

吳農祥傳

朱亮彩字杓雯以舉人為慈谿教諭新學舍端士習聲譽
藉甚擢岳陽縣令罷故時夫役驛傳諸弊又創義塾置
學田以惠諸生困乏者

顧鳴陽字岐雖以進士知山陽縣縣號煩劇鳴陽以樸誠
廉靜處之故時有天役驛傳及芻牧官馬諸弊鳴陽一
切裁去山陽人至今德之

以上吳志

朱銓達字在三中武舉倜儻負神力康熙十三年投大軍
自効戰捷黃鳥嶺大溪灘九龍山等處復破仙霞關功

第一後隨征海盜鄭經恢復閩疆授左都督銓達敦氣
誼與友交不恤利害好獎譽文士賴以成名者甚眾後
遷均房參將卒于官

夏雲字奇峯武進士授潼關守備會王輔臣叛關中陷雲
被執賊迫之降不屈賊怒絕其食雲以所佩刀割韉上
馬革啖之得不死得間脫走歸賊平陞都司卒

以上上海鹽續圖

沈德涓字二含以明經為開化訓導兵後人盡棄學德涓
捐俸新學宮竭力振興文教著有聖門表誌諸書

吳志

張行健字天行充刑部堂書例授正九品選江南祁門大

洪嶺兼良禾司巡檢饒寇侵邗行健率壯丁拒之眾寡不敵免胄北面叩頭曰臣力竭矣遂被執迫之降力抗不屈賊怒斫其兩臂猶直立不仆罵益甚納之坎中以刃割其腹遂死胥役方茂胡振竝死事聞 贈江南金山衛經歷乾隆六十年

詔查死難諸臣行健六世孫璉世襲恩騎尉

徐容字顛中祖琨崇祀鄉賢父穰字荀三人品端方容康熙癸酉赴省試祈夢于墳忠肅示以冊面批清晰二字且曰歸語汝祖吳三桂一事當報汝甲第已而果獲雋墨藝批亦符因將吳三桂事詢諸祖祖曰曩有僕吳與

婢三桂姦事露婢羞憤幾隕命吾力為掩護即以三桂配吳不意神鑒及之容中康熙丁丑進士仕至西安知

府

海鹽縣志

石廷猷字襄綸康熙壬辰歲貢性耿介不苟取予樂訓迪後進未嘗計其修脯以故成就者甚眾

于志

沈曾懋字子勉康熙庚辰進士直隸南皮令陞禮部主事遷吏部員外郎令南皮時振起凋敝全活災黎無算兩任部曹秉公執法著有性理鈔

以上海鹽續圖經

鄭宣字巨展以進士授內閣中書出為淮安同知惜公帑軫勞役政績茂著總河疏請大用未果卒著有滄江集

吳志

錢瑞徵字鶴庵以舉人授西安教諭持行嚴謹訓士必以禮法尤勤講課書得趙吳興筆法善畫松石喜吟詠著有忘憂草朱彝尊為之序以孫陳羣貴贈如其官崇祀鄉賢瑞徵同里人陶日襄字伯宗五歲入村塾聽誦孝經端立不去瑞徵聞而異之日襄年十六博通經史又從錢汝霖游得其學瑞徵命陳羣兄弟受業於日襄立講經法各隨所見為注課餘令讀古詩及李杜集又躬習洒掃應對進退之節學成辭去後不知所終陳羣集中方子春詩為日襄作也

海鹽續圖經一
參香樹齋集

吳甫及字維申以進士歷官戶部郎清操自勵不攜家累泣官搜剔故弊同僚咸憚之自奉布衣蔬食卒之日幾無以為殮著青山草堂集子叔獻字子文以舉人授貴州婺川縣令有政聲

吳志參海
鹽續圖經

戚令畹字朗園敏悟篤學康熙丙午領鄉薦後聯雋南宮授內閣中書遷部主事歸里築玉山草堂寓東山之意卧疴不起臨終云父母未膺封誥我罪如何流涕而逝

海鹽
縣志

錢采字介亭郡庠生康熙壬子副貢讀書深入理窟以涵養性情變化氣質為訓築小樓於壺溪顏曰清心與從

兄汝霖講學其中手纂濂洛關閩之言附以己見名曰
性理提綱持論甚正

海鹽縣志

錢紹隆字仲扶康熙壬子舉人癸丑進士庚申選四川富
順令時大兵集瀘州進討吳孽餘黨譚宏距富順近芻
菱糗糧供億無乏姦民乘機抄掠下令城門弗啟露處
郊外密擒首惡置之法川撫姚公薦授刑科給事中居
諫垣侃直直督某庇大盜馬回子欲從輕典紹隆露章
參駁遂成嫌隙庚午典陝西試浙藩馬某欲私其子正
色拒之浙藩故黨於直督兩人者遂賺取紹隆子私書
上聞削籍家居卒後蜀人合詞上請崇祀名宦祠

海鹽縣志

曹辰容字石苓號杼亭登康熙辛酉賢書甲戌成進士選
授湖廣甯鄉令巡撫金公以邑令新任將密拏叛案傅
安兩姓及連坐三十三人徑發司府先自邑人傅俊先
與傅再輿有私怨又與寶慶民安然然有隙遂捏稱十
三太保裝點成案辰容上言事涉挾仇楚俗生女呼貞
生男呼保貞取其節保取長生傅安兩家一生男六一
生男五皆以保名合伊兩父共有十三耳因得白其冤
辰容登科時年已五十有二六十五發甲七十一作令
七十九歸里幾於耄矣又優游林下十有餘年卒年九

十四

海鹽縣志

陸張烈字昂千康熙庚辰進士知山西浮山縣抵任即謝
 餽遺除浮耗歲早倡輸賑粟民無失所者力振文教童
 子試增至數百人詳請改小學為中學治訟口決如流
 無留獄行取授吏部主事官至兩廣運使

浙江通志

王顯一字立峯康熙丙戌進士選成縣知縣始至禁加派
 除陋規慎詞訟興文學調西甯委至鎮海堡地方收放
 草束顯一躬自料檢不假手胥役上官嘉其才留軍前
 効力顯一辦理精明運糧先期至主兵者深嘉之即令
 沿途放糧回西甯積勞卒廕一子承篤入監

浙江通志
參海鹽圖

經

陳宗標字兆龍康熙乙未進士任山西臨汾令邑有龍池
 向立渠長掌水因不均爭訟憲委宗標踏勘見有大木
 橫塞泉處訊其木俱稱累百年所未敢動者宗標令去
 之民踴躍從事訟遂息後改台州教授未赴任卒

于志

錢之燾字幼日弟紹隆字仲扶康熙癸丑同榜進士之燾
 善詩古文辭與彭孫適齊名未及授官卒紹隆為四川
 富順縣時蜀中初定一以寬仁撫綏窮黎戴若父母行
 取補給事中卒于官

吳志

沈光珏舉人少負異質有得于性命之學于四書大易及
 正蒙諸書多所纂述為人嚴厲不苟嘗笑子李楷秀水

有傳

吳志

俞雲來字漢乘以進士授安仁令時當兵燹隨大兵招

降賊朱天錫等數千人全活閩廣諸郡飢民甚眾調任

湖口擢兵馬司正指揮

浙江通志

曹燕懷字二社以進士授內閣中書為人剛健論事不肯

少屈以此人多忌之竟不盡所長卒著天爵堂集弟辰

容字石苓康熙甲戌進士授湖廣甯鄉令多惠政折獄

稱神明比歸士民追送呼清官者不絕於道

吳志參海鹽續圖經

陳遇麒字季游所學孫壬子登鄉薦授錢塘教諭有沈生

近思少孤貧靈隱僧收為徒遇麒一見奇之令蓄髮肄

業學署後成進士為名臣陞湖州教授以疾歸著有西

湖偶吟樊圃詩存閩遊草

錢標字公卓敦行力學入太學讀書不附聲氣就吏部試

授州判歸惟擁書課子賦詩寫字以為樂疾篤口占云

伴我清魂梅一樹更添殘月不愁孤夜闌忽聽雲間喚

欲跨惟嫌鶴太癯吟畢而逝

以上海鹽續圖經

錢標初字又鶴泮子諸生入國子監一試京闈念母不已

即引歸盡孝養周卹族黨買田以供舅家墓祭弟禎歿

遺腹生男殫心撫育嘉興自明宣德四年析嘉興縣地

方立秀水嘉善二縣其時祇依戶籍為憑不以疆界分

嘉興府志 卷五十一
畫故三縣之田互嵌民相安者二百餘年萬曆十三年
嘉善民忽以糧額不均起訟於是三縣爭訐不已江浙
賦重相傳明太祖惡張士誠拒守故重斂其民畝稅有
輸官七斗餘者標初辨其非謂禍始于賈似道經界推
排之役當日原有官田民田官田輸租民田輸稅其後
知府趙瀛取而均攤之嘉興官田不及二千頃而民田
五千八百餘頃故其賦輕嘉善民田止三千一百餘頃
而官田二千七百頃故其賦于三縣中差重由官民田
數不均非因嵌田之故著論萬言推衍事始更端詰難
悉有原委朱供奉彝尊亟稱之

朱彝尊墓誌參
海鹽續圖經

錢炘字穉光標初子國子監生考授州判職幼從朱檢討
彝尊受經學陸檢討奎勳學舉業生平以名節學術自
勵兩赴京兆試不遇遂絕意仕進時舉其祖嘉徵劾魏
璫疏中讀聖賢書傳家惟忠孝二字語訓子弟著有自

賞集

伊志

馬維翰字墨麟性骯髒不屑習經生業工詩以進士授吏
部稽勳司主事尋轉員外郎兼考功銓政肅清陞工科
給事中旋出四川清丈田畝相度要害請改黎川千戶
所爲清流縣轉兵科掌印給事中畱涖建昌道占兌桑
昂邦等部跳梁焚掠及烏蒙我師會勦維翰駐打箭爐

軍書排闥達旦不假寐冰雪山積鑿徑通馬道苦寒裂
膚與廝養同甘苦涼山數百里地震疾馳勘災散賑得
實三渡水摩步蠻殲厥夫方進勦維翰力陳營兵不輯
及各廠病蠻狀遂得罷廠撤兵撫各番誅止其魁全活
無算在蜀七年政簡刑清論勦撫事悉中機宜居恆和
易近人遇事勇決無所詘後以不阿上官意解任起江
南常鎮道副使丁外艱歸年四十八而卒所著有墨麟
詩十二卷

俞兆晟字叔音康熙丙戌進士入翰林典試山東督學江
南歷官戶部侍郎兆晟性剛毅而完養深粹卽之温和
有古大臣風著海樹堂雜錄蔭華軒筆記靜思齋文集
等書

朱之溥字沛蒼以舉人知潛山縣邑苦旱前明邑丞常公
曾開河四十餘里至是已塞溥下車卽率民濬之民爲
之歌曰微昔之常疇貽我康微今之朱疇卹我瘡彼吳
之塘爲鄭爲白漠漠涓涓維二公澤

潘兆新字銘三舉人深經術具經世才海鹽海塘南爲三
澗寨北爲朱公寨歲苦潮溢衝入內河兆新建議三澗
寨築海塘如舊改凹爲凸且照舊址接築矮塘數十丈
朱公寨以北向來無石塘者創築中塘一千二百丈濱

海地得安督撫李衛奏請簡用兆新以母老固辭著周禮纂要輯註增訂小四書見滄山房稿閩遊詩鈔

朱以誠字望亭以進士任福建長泰縣貸貧民積逋二千餘兩調至漳浦邑旱出倉穀以糶後因姦民張崑蔡懷為亂窮治之被刺卒

俞鴻馨字尹思辛丑進士由庶常出為靜海令甫下車蝗蝻熾發夜默禱於天翌日蝗抱草葉纍綴而殭轉冀州知州捐貲修堤三十餘丈民安耕耨卒於官士民奔哭

立祠祀之以上海鹽續圖經

陳世倬字公佐以進士授戶部主事擢兵科給事中康熙

三十八年奏銷案內有漕運腳費部駁咨追積款世倬上疏奏免之除河南按察使內陞都察院左副都御史歷官數十年囊橐蕭然歸里後與錢觀察元昌纂修邑圖經及藝文續編子克鎬字芑豐康熙癸卯舉人華亭令著有詩四集柳堂詩語十二冊伊志

陳鼎字致和湖廣麻城令屢雪大獄著循聲有警心錄伊志

顧長祚字容大舉人授湖北咸甯令時驛站需索無厭長祚力持之稍戢服邑有公地兵丁欲據以牧馬大害民稼請於總戎得免又建造河橋橫亘數十丈民大便以

老乞歸卒伊志

錢元昌字朝采明太常薇六世孫父標有潛德元昌居貧力學中康熙壬午副貢授廣東長甯令捕盜有功內薦兵曹出知柳州府時羅城通道鎮四圍山險有小徑容一人出入種蠻頭人黃光直據險自大元昌撫之歸順開鑿徑道後調守桂林修築陡河農田商楫賴之陞貴州糧驛道以年老歸出貲葺修太常祠散餘貲以周親族著有益翁詩稿八卷工繪事花鳥草蟲極生動有致

伊志

陸坪字履莊以舉人授江西萍鄉令邑四面皆山多棄地外省人來開墾者搭棚以居子孫遂號棚民士人擯不

與齒致自棄為匪坪以棚民中亦多善類請定為客籍得與應試改山陰教諭卒

伊志

陳韶原名克鏗字鳴盛雍正癸卯舉人授直隸欒城令後攝亳州捐俸成北關外石橋民感德建祠橋側升壽州知州州有安豐塘即芍陂塘歲久淤塞為鳩工疏濬環塘田數千頃悉成膏腴調泗州泗多水患力請開濬謝家溝奉檄築盱眙高家堰易甌為石櫛沐年餘大吏嘉其法表為各工式

海鹽縣志

陳鼎字致和由太學投效河工授湖北麻城令先是邑有涂如松者與妻楊不相能楊他走為諸生楊同範藏複

壁中楊弟五榮誣如松殺妻與同範謀謬以男屍報縣
令湯應求察其偽獄不能具督委廣濟令高仁傑重檢
竟指為女屍酷掠如松等俱誣服獄成嗣同範鄰嫗憫
松冤密以告鼎鼎慮事洩無由平反乃偽訪同範家畜
娼身率快手直入毀其壁果得楊氏訊實邑中稱神明
焉後調福建甯化令竝有政聲著有鏡心錄海鹽縣志
俞藻字秋崖雍正壬子舉人河南永興令改會稽教諭課
士有法邑諸生勒碑頌德朱瑛字新傳乾隆癸酉舉人
任東陽教諭陞山東萊蕪令廉潔愛民卒于官著南菽

詩彙伊志

徐煥然字晉叔雍正甲辰進士授翰林院編修江西典試

充三朝實錄一統志武英殿纂修官被劾罷歸著有桐

村詩三卷伊志

孫廷權舉人湖廣咸豐令捐俸立義學設養濟院禁溺女

民風一新有土司秦姓者為害於民廷權申文數其罪

卒于官伊志

吳懋政號蘭陔乾隆壬申進士授廣東博羅令興利除弊

視民如家人父子有負冤者必為昭雪人以佛子呼之

比去立祠以祀改處州教授告歸以文章教後進游其

門者輒掇高第去著有粵程稿入銘堂詩集伊志

陳夢鑑字卜年考授州判歷任燕蘇秦蜀所至勤于撫字有利干民者力所能興無不盡舉後轉騰越州以老歸

子孝治博雅工詩著有友于集紅豆山房集伊志

吳文暉字翼萬篤學敦行母病殆禱於神願減已算延母

壽父沈疴久文暉晝夜侍揮之去屏息牀簣間父歿哀

毀骨立見者動容舉乾隆丁卯鄉試三上公車不以一

刺投貴人門晚絕意進取以經術教授遠近宗仰稱人

師激水百餘年來人文散佚文暉悉力搜采文獻賴以

有徵著有燈庵詩澉浦詩話日記跋尾等書子以敬字

惶仲事繼母孝初好禪學後讀程朱書有得瞿然曰幾

誤矣學非程朱非學人不學程朱虛為人早卒著有匏

齋集伊志

任昌運字香杜乾隆丁酉舉人官餘杭教諭壬子餘杭瓦

窰塘決天目山泉奔騰而下昌運建議以米囊數千實

土交投柴草以彌其隙不日而塞後築烏龍澆仍用是

法餘民至今感之于志

陳基善字穀也乾隆庚子舉人官福建甯化縣知縣鋤強

扶弱民皆悅服于志

俞光裕字勤圃宰江西龍泉縣興利除弊龍泉士民作詩

歌以紀其事子克振歷官湖南靖州醴州雲南廣西州

刺史所至有政聲于志

董承英字偉文歲貢生司訓吳興精易理兼善堪輿訓士循循有法度壽至九十于志

陸趙泰字時明由進士宰正陽以教化為先不事刑罰有

訟即予聽斷吏不得操緩急常單騎巡田野語桑麻諭

民勤修六行親課諸生第其甲乙是歲邑人馮洵遂魁

鄉薦正陽登賢書自此始于志

朱佩蓮字玉階乾隆壬戌進士除翰林編修督學廣西奏建太平府考棚歲辛未歉收濱海竈民販荒鹽為活場使某以拒捕告大憲以兵至時佩蓮里居馳馬途次以

百口保澈民事得寢歷官侍講貧無餘貲好獎掖後進

所作詩文卓然成一家言伊志

朱丕烈字正咸乾隆戊辰進士歷官工科給事中典江南

試督湖北學政皆得士巡視臺灣開壅塞灌田民利賴

之督學廣西被劾降官著有如蘭軒詩集伊志

祝櫓良字東毓乾隆乙酉舉人授貴州天柱令遷麻哈知

州麻哈民苗雜處最稱難治櫓良至以德綏之士司感

服民情愛戴于志

朱正蒙字育泉乾隆庚寅舉人授山東平陰縣知縣東省旱歉籌畫賑濟教匪滋事被煽惑者開導釋之保舉卓

嘉興府志 卷五十六
異旋卒宦橐蕭然士民追思遺德賻贈千金子光昭卻之士民以金建朱公祠焉

海鹽縣志

朱蘭馨字芬若乾隆辛卯進士宰鉛山地當衝要民情健訟蘭馨手批口斷民皆帖服陞吏部稽勳司員外郎精察不爲吏欺保送御史尋卒著有松喬詩鈔

于志

馮桂芬字燕山乾隆丁酉舉人由國子監學正陞助教擢直隸宣化同知居官清介聽斷詳明遷冀州牧將之任宣化民遮道畱之

于志

朱昇佑字篁雨乾隆己酉副貢官雲和教諭日與諸生講習文藝雲和向無科第至是始有登賢書者著有篁雨

詩鈔臺洋集

于志

陳新字秋江乾隆壬子副貢以州判分發湖南適苗頑不靖委辦軍需以賢勞著補茶陵州判旋擢綏甯令撫輯苗獠民皆得所歲歉設法平糶全活甚眾

于志

陸光宗字古山從九品從政黔楚時良民爲賊牽連者甚夥幕府令讞獄光宗爲白其寃悉縱之以軍功擢縣令所至有政聲仕至酉陽知州

于志

朱方增字虹舫本生父春煊國學生嘉慶甲子歲饑設法賑濟有厚德方增辛酉進士由編修洊升侍讀學士擢內閣學士歷充雲南山東鄉試考官提督廣西江蘇學

政所至以維持風教爲事作黜邪導正詳示利害說分別十利十害剴切勸諭得

旨刊布嘉慶十八年應

詔陳奏一疏論尤切要熟諳

朝章典故史館撰述號爲通才年五十卒於官著有從政觀

法錄三十卷求聞過齋詩集十二卷

海鹽縣志

徐葆甫字南州道光乙酉拔貢用陝西知縣歷任盩厔咸陽等縣爲政以不擾爲主所至省科條減徭役釐姦剔弊吏莫敢欺民呼爲徐青天任盩厔時麥秀雙歧邑紳路德作頌紀之

宣宗詔舉循吏膺薦入都尋擢鄆州牧卒于官

海鹽縣志

朱錦琮字尙齋吏部員外郎蘭馨子

仁宗五旬萬壽呈獻詩畫拜緞匹荷包之賜挑取膳錄國史館議叙授安徽廬江知縣旋署泗州知州所至興水利勤撫字宣城遇水災力籌拯救皖撫陶澍以賢員薦尋擢宿州牧以俸廉助餉例用知府授江西瑞州守薦舉卓異遭母憂去官服竟任山東東昌府興利除弊振興文教以年老謝事歸里著有治經堂詩文集四十卷日次詩兩卷信疑隨筆十二卷

海鹽縣志

張伯魁字春溪以議叙官甘肅洮州照磨嘉慶二年從征

四川身先兵勇生擒賊首仕至甘肅平涼知府于志

朱昌頤字朶山嘉慶癸酉拔貢道光乙酉舉京兆試丙戌

成進士授翰林院修撰次日

命書摺扇賜文綺蓋異數也官戶部時堂牒有偽坐鑄級尋起

主事升員外郎甲辰充會試同考官典試雲南丙午遷

山西道監察御史擢吏科給事中會與同僚論事齟齬

牽連被議

文宗御極起用主事謝病歸里昌頤官農曹值創辦南漕海運

事宜詳議規條奉行稱便任言官時條陳南漕積弊請

由江浙招商海運得

旨允行咸豐三年粵匪擾浙奉

命辦理團練募勇駐防青陽匯事平叙功

賞還給事中銜邑南鄉三澗寨海塘久圯督勸紳民捐築主講

敷文書院前後八年學者奉為楷模年七十二卒著有

鶴天鯨海詩文彙海鹽縣志

支清彥字少鶴少有奇童之目道光乙未舉人戊戌入詞

館乙巳分校禮闈大考一等擢庶子尋遷侍講學士視

學四川裁汰陋規甄拔實學士林頌之任滿謝病寄寓

陝西旋值粵匪滋事卒於陝海鹽縣志

彭世洙原名世鑑字闔亭自少敏悟器宇凝重善屬文書

法道勁早歲遊庠食餼道光壬午舉人七應禮部試戊戌成進士以知縣分發山西需次未一年卒湘鄉曾文正為撰傳

海鹽縣志

朱毓文字鹿賓嘉慶庚寅進士授安徽舒城縣知縣首崇學校民有訟訴委曲開導如家人語有兄弟爭地者伯與季均年六十餘毓文愀然曰我有兄早逝至今以為憾爾兄弟皆高年為人生不易得之樂乃手足自殘乎因感泣願棄地勿取以父憂去官服闋任貴州仁懷縣知縣署安平縣事安平城西有巨澗民多棄屍歲久骸積悉檢埋之任仁懷時山水驟發壞民居立往賑給災

黎獲全年六十二辭官歸家居八年卒著有坦坦居詩

文豪

海鹽縣志

吾德涵字笏山嘉慶辛酉舉人丁丑進士用刑部主事改授江西進賢令時銀價貴鄰縣徵收錢糧輒議加增德涵恐病民持不可又修築蘆溪塘以免水患民甚賴之調署新建清釐積案未幾告養親歸遭父憂築廬墓旁以申哀慕服竟闕為管山草廬雜蒔花木觴詠其中書法精妙一時牌版皆出其手老年猶日書心經一篇人爭求之年七十四卒

海鹽縣志

陳希敬字笠雨嘉慶丙子登賢書道光癸未成進士授江

蘇金壇令調任江陰仕至直隸深州知州咸豐三年粵賊突犯畿輔連陷州縣九月初七日諜報賊將逼城申刻城陷希敬危坐堂皇罵賊被戕事聞得

旨追贈道銜賜卹如例著有菰蘆老屋吟稟退耕堂詩集海鹽縣志

沈世奇福建雜職道光十三年陳逆滋事協守臺灣出力會內渡遭風淹斃大吏為請于

朝得

旨贈卹如例竝蔭其一子入監讀書期滿以州吏目用于志

朱右賢字秋田父光昭嘉慶初投效四川軍營署雲陽縣尉歿後遂寄籍右賢從其外祖敖姓入榮昌縣學道光

戊子舉人丙申進士授貴州梓桐令升威甯州知州署安南縣事咸豐四年十月賊陷縣城力竭被害妻周氏及女同時殉節如例賜卹建專祠海鹽縣志

沈炳垣字紫卿道光癸卯舉人乙巳登蕭錦忠榜進士選庶常授編修咸豐壬子大考翰詹列高等擢中允充四川副典試督學廣西同官祖饒彰儀門外臨別鞞刀慷慨言曰際此寇氛充斥使者搜巖採幹務獲干城之選非徒取華國才也馳抵桂林與中丞勞崇光籌戰守策山川險要瞭如指掌勞愧勿如會梧州請試毅然就道曰軍書旁午猶知投戈講藝此正人心振起之機也省

會士人羣遮畱堅勿允時七年秋月按試甫二日會匪圍攻與知府陳瑞芝等嬰城固守艱難措拄者九十有五日後垂危有野處弟子員曾列名請試者總入給曰請禱城南神祠為民請命意將擁匿為脫禍計仍勿許城陷仰藥自盡賊有識面者劫至僧舍救治使蘇且戒羽翼慎勿傷沈學使炳垣瞑目唾罵巨魁聞恚甚命鬻割之屹立不為動賊怒猶未沫積薪焚尸時有老卒混跡賊中備見慘死狀竊藏燼體走達巡撫奉

旨追贈內閣學士兼禮部侍郎銜照陣亡例

賜卹諡文節世襲騎都尉廣西省城建立專祠載入祀典

國史

館傳參錢樞部撰行狀

曹為鉞字東井寄籍順天大興以議叙選廣西按司獄升土田州同知咸豐五年擢龍勝通判壤接湖南地無城池六年苗匪猝至遇害子文洙孫乃楨同時殉難卹贈

如例

海鹽縣志

任沛霖字硯雲道光庚子歲貢癸卯甲辰聯捷成進士授直隸高陽令居官廉惠邑有盜魁密擒之督標武弁某素庇盜欲脫其罪沛霖執不可白諸大府卒置之法民咸德之旋調任咸安涖任甫三月卒於官著有雙桂軒

詩橐一卷

海鹽縣志

黃燮清字韻甫工詞翰審音律道光乙未舉人屢上春官不第充

寶錄館謄錄用湖北知縣病不之官自是怡情山水著述益富家居拙宜園爲楊晚研太史別業燮清改葺晴雲閣爲倚晴樓繼又得硯園廢址栽花種竹自號兩園主人時與知交觴詠其間有終焉之志咸豐辛酉賊陷縣城乃間關之楚就官大府耳其名器重之壬戌分校鄉闈權宜都令邑有虎患捕不獲爲文牒神虎遂滅夏旱又以文禱翼日雨旋調任松滋有政聲未幾卒著有倚晴樓詩集十六卷詩餘四卷樂府七種選刻詞綜續編二

十四卷

海鹽縣志

徐槐廷字雲鶴弱冠入郡庠食餼道光乙未舉人立品端方以文章教後進多所成就沈文節炳垣顏學士宗儀皆師事之年五十餘始以大挑官粵東授遂溪令調順德令擢潮州黃岡同知歷任地方誅盜賊清積案除苛派恤獄囚初任鶴山卽有萬家生佛之號任恩平時值土民客民爭鬪乃親歷各村剴切曉諭民咸悅服任開平時有長沙村民爲鄰縣茭荻村民挾讎誣陷新甯令將臨以兵人情洶洶急爲白其寃於大府事遂寢保全甚眾在韶州軍營三載鞠獄務求詳當嘗有論事敢寬

三尺法原情莫詗片言能之句歷充咸豐王子辛酉同
 治壬戌同考官所取多雋才梁耀樞譚宗浚先後皆成
 一甲進士藝林豔稱之引疾歸里建宗祠立義田祭田
 樂善好施鄉里咸欽齒德卒年七十五著有自得齋詩
 鈔以子用儀官贈通奉大夫

王彬撰傳

